





1622. 13^e Jan 1712. J. D. Haver

LA
PROMENADE
des bons hommes,

OV
IVGEMENT
de nostre siècle.

M. DC. XXII

Case

F

39

.326

THE NEWBERRY
LIBRARY

1622.41

L'V n des jours du mois de May de la precedéte
 Lannée 1619. trois personnes d'honneur, doctri-
 ne, & merite, & qui n'esperent pourtant autre
 recompence, que celle que porte le siecle, (c'est à
 dire nulle pour gens de ceste estoffe) firent
 partie pour aller entendre Vespres au Conuent
 des Peres Minimes, dits les bons-hommes de Ni-
 geon, prirent vn bateau pour les y conduire, &
 arresterent de retourner à pied par le pré aux
 Clercs : estans entrez au bateau, assis; l'vn d'eux
 (le sieur de la *Timefe*) considerant le peuple qui
 y alloit le long de l'eau, le bel aspect de la ville de
 Paris, & des champs, jettant vn grand soupir, dit
 bon Dieu, pourquoy falloit-il que vous agran-
 dissiez tant ceste ville, departissiez tant de faueurs
 à ce Royaume, pour les retirer tout à coup, nous
 rendre le plus miserable peuple de la terre, par
 tant de diuisions qui se fourrent, entre toutes sor-
 tes d'estats & de personnes, chacun portant en-
 uie à son voisin, son amy, son parent, les freres
 entr'eux, & les enfans avec leurs peres & meres,
 estans en mauuaises intelligences, & ce qui est de
 plus déplorable, est que nous viuons en vne telle
 confusion, qu'il semble que toute Iustice soit
 bannie d'entre nous, ce qui me fai&t croire, que
 jamais homme ne dit sentence plus veritable que
 le Poëte Liricque, *Que l'aage de nos peres estoit pire que*
celle de nos ayeulx, qui nous ont engendrez plus méchans,
Et deuons croire encore pis de nos enfans: Surquoy le
 sieur de la *Prosapsie* va dire, ie suis d'accord (Mon-
 sieur mon Confrere) de vostre plainte de nos de-

Cordres, & ce qui est de pis, que je ne voy gueres
 de gens, qui s'aduancent d'y apporter remede:
 mais ie ne puis demeurer d'accord avec le Poëte
 que vous auez cité, pource que si cela estoit vray,
 depuis son temps, mais depuis le commence-
 ment du monde, où en serions nous maintenant?
 c'est vne plainte que l'on a faicte en tous les sie-
 cles, & l'auéz leuë dans ce mesme Poëte, en plu-
 sieurs de ses doctes escrits: le sieur de la *Timese*
 réplique. Si nous ne le voulons croire, au moins
 deuons nous croire ce que nous en voyons de
 si débauché, & c'est maintenant que nous pou-
 uons dire que toute chair a corrompu sa vie, qu'il
 n'y a plus de santé parmy nous, depuis la plante
 du pied jusques au sommet de la teste, tout est vl-
 ceré. Puis que nous en sommes venus si auant, je
 vous prie me dire où vous pouuez remarquer
 quelque partie saine en ce grand corps? Com-
 mençons par les moindres, qui sont les enfans &
 les seruiteurs, où est l'obeïssance des vns enuers
 leurs peres & meres, des autres enuers leurs
 maistres & maistresses? ne sçauons-nous pas
 que la puissance des peres & meres sur leurs en-
 fans, est le fondement tres-certain des loix de
 l'honneur, de la vertu & de toute pieté? iusques-là
 qu'ils ne peuuent commettre faute ny crime qui
 puisse donner sujet à leurs enfans, de se des-vnir
 seulement d'auec eux, à plus forte raison de s'y
 opposer: c'est pourquoy la plus-part des peuples
 mieux reglez, fondez sur la loy de Dieu & de na-
 ture, permettoit aux peres & meres, d'vser sur
 eux, de leur puissance souueraine, jusques à la

5
mort inclusiuement. Vous sçauiez que nous autres Gaulois en vsions, & les Romains mesmes les mieux policez: dont je ne vous feray souuenir que de peu d'exemple: de Cassie, qui jetta son fils hors des Tribunes, & le feist mourir, pour auoir voulu publier vne loy sur les heritages, sans que personne ausast rien dire, & de Brute qui feist tuer ses deux enfans, pour auoir contreuenue aux loix: & Torquat apres auoir fait triompher son fils, pour la victoire qu'il auoit obtenue, luy feist incontinent trancher la teste, pour auoir donné bataille contre sa deffence. Il falloit en ce temps là (où la raison & la Iustice auoient lieu) que les enfans demeurassent en leur deuoir. Ce que practiqua brauement & glorieusement le fils d'un autre Torquat, qui bien que mené rudement de son pere, ayant sceu, que le Tribun Pompone en auoit rendu plainte publicque, l'alla trouuer jusques dans sa maison le poignart à la main; le menaçant de luy couper la gorge, s'il ne se desistoit de sa plainte. C'est pourquoy Platon disoit qu'il n'y a prieres que Dieu entende si volontiers, que celles des peres & meres, pour ou contre leurs enfans: tesmoin l'imprecation d'Oedipe, contre les siens, pour les auoir méprisé. Mais sans aller chercher les profanes, considerez je vous prie ce que Dieu Tout-puissant en a ordonné en infinis passages de l'Ecriture, dont je ne vous repeteray que ce qui est en l'Ecclesiastic. *Que celui qui honore sa mere, est comme celui qui assemble les tresors, celui qui honore son pere, viura de vie fort longue, que qui obeyt au pere, il soulagera sa mere, la benediction*

du pere, assure les maisons des enfans, mais la maledi-
 ction de la mere, destruit les fondemens : combien est
 grandela mauuaise renommée, de celuy qui laisse son pere,
 & celuy est mandis de Dieu, qui laisse sa mere. Si Dieu
 l'a dit, il a executé si rudement, que la posterité de
 Cham le resent encores aujourd'huy, qui ne fust
 pas maudit pour auoir mal fait, mais pour n'a-
 uoir pas fait le bien qu'il deuoit, cachant la hon-
 te de son pere; & Absalon, que deuint-il apres se-
 stre reuolté contre son pere ? ce sont personnes
 auxquelles il ne se faut pas joüer, si l'on n'en veut
 estre promptement & exemplairement puny.
 Pourquoy preuenir, les mieux censez legislateurs,
 ont commencé leurs loix politiques par l'insti-
 tution & instruction des enfans, vous sçauiez ce
 qu'en escrit Xenophon tout du commencement
 de son Histoire, ce qu'il en dit au traicté de la Re-
 publique des Lacedemoniens, où Licurgue feit
 plusieurs beaux reiglemens sur ce sujet, entr'au-
 tres le reestablisement des maistres des jeunes
 gens, jusques à leur prescrire leur contenance en
 marchant par les ruës, d'auoir leurs mains cou-
 uertes de leurs manteaux, ne point parler, ne re-
 garder ça & là, mais deuant eux seulement, qu'ils
 escoutassent soigneusement les anciens, pour
 apprendre d'eux, & autres exercices d'honneur &
 de vertu. C'est à ceste heure à vous (Monsieur de
 la Prosapsie) de nous dire, si vous recognoissez
 quelque chose de tout cela en nostre jeunesse, mais
 bien tout le contraire, vne débauche continuelle,
 vn mépris de leurs peres & meres, frequentation
 avec des gens perdus, avec des flateurs, qui leur di-

sent qu'ils sont grands, soit d'aage, soit d'autorité, qu'ils sont capables de se gouverner tous seuls, & cependant ces beaux Conseillers les plument, Dieu sçait comment, & bien souuent aux dépens de ceux qui n'en peuuent mais: le moindre vice est la desobeïssance, il y en a qui en adjoustent beaucoup d'autres, dont les peres & meres meurent de regret. Je viens aux seruiteurs, qui semblent aujourd'huy compagnons de leurs maistres, entre lesquels de mil, à peine s'en trouuera-il vn qui serue cordialement: ils tiennent le bien de leurs maistres commun, ny ayant moyen que de l'attraper, ou le consommer, point de fidelité, point d'affection. Je sçay bien que nostre Sauueur nous a tous affranchis, mais cela se doit entendre Spirituellement: & beaucoup de grands personnages ont tenu, que le seul moyen de remettre l'obeïssance, seroit le restablissement de l'esclavage, puis que Dieu l'a ordonné en la posterité de celuy que ie vous ay nommé tantost: Car d'en aller faire plainte en Iustice on n'auroit gueres d'affaire, d'y perdre temps & argent, pour la raison que l'on en auroit. Si ces deux sortes de personnes, qui sont en puissance d'autrui, approuuée de Dieu & de nature, ne s'adonnent qu'à mal impunément, que pouuons nous dire des autres qui sont libres? prenez garde (ie vous supplie) aux villageois, combien ils sont rogues & audacieux, s'appropriant brauement le bien de leurs maistres, voire par larcins, & de iour & de nuict, tout leur est de guerre: & s'ils n'estoient assujettis à la Taille, & n'auient crainte d'yne venuë de gens-d'armes, on ne

les pourroit tenir, tant la plus-part d'eux sont insolens. Suiuent les artisans, qui en leur trauail ne visent que d'auoir de l'argent, ne se soucient point de leur besongne, qu'ils vouldroient estre aussi-tost vſée que liurée, d'honneur & de respect: Il n'en faut plus esperer de ces gens-là, & diront franchement, ie n'ay que faire de vous, en payant quittes: ce qu'ils demandent de salaire, il le faut payer, sinon venir à la prisée. Belle visitation, qui ne se fait pas pour l'honneur de Dieu & zele de Iustice; quatre ou cinq personnes y viennent les mains ouuertes, & s'en retournent clausées. Le Me en l'art que l'on en fait iuge, est tousiours pour son compaignon; j'en ay veu vn où le priseur passa plus auant que la demande, & en falloir passer par là: & voila le Bourgeois frotté & estrillé, & qui pis est moqué: c'est pourquoy ie m'estonne de ceux qui viennent à faire faire ces visitations, qui ne leur apportent que de la despence inutile. I'en ay entendu forces plaintes, & en entens tous les jours, mais ie les assure tousiours, qu'ils ny trouueront point de remedes, & qu'ils feront comme celuy que ie vis vn jour acheter pour vn sol de vis argent, pour en frotter vn liard, du temps que ceste monnoye auoit cours: & neantmoins telles gens se qualifient hautement Bourgeois, par vne trop facile conecssion, que Numé à Rome & Lycurgue en Lacedemone ne trouuerent raisonnable, deffendant aux Citoyens d'exercer aucun métier, tous reseruez aux Esclaves. Ie pense qu'apres ceux-là sont les Marchands, parmy lesquels, s'il y a de la fidelité, soit en leur
parolles,

parolles, ou marchandises, i'en croyrois bien quelques-vns d'entr'eux. Quand à leur gaing, il n'y a point de borne ny de taxe, il est tel qu'il leur plaist, ce qui vaut 20 sols, ils votis le feront 5 ou six liures, hardiment; & si vous leur baillez, ils le prédroient sur leur conscience assurement, appelant gaing, tout ce que l'on peut tirer d'une personne, qui bien-souuent ne s'y cognoistra pas, & moy ie tiens cela pour vn pur & signalé brigandage: pire que celuy qui se faict dans les forests, dont l'on tasche à se donner garde; mais de tels marchands, l'on est attrapé en cajolant la marchandise: Il est raisonnable que celuy qui trauaille pour apporter les commoditez des Concitoyens, gaigne quelque chose, mais ce gaing doit estre certain & arresté, & non pas au triple & centuple, si le cas y eschet: dont ie sçay bien que l'on ne tient compte, mais estant vn gaing illicite, Dieu le sçaura bien repeter, sinon en espee, sur le corps de celuy qui en aura vsé. De ces gaings illicites, sort vn grand desordre, c'est que ces deux dernietes sortes de personnes se voyans du bien (Dieu vueille qu'il soit bien) quittent boutique & marchandise, se jettent aux offices, où ils sont trop facilement receüz: ce que les Indoïs n'approuueroient pas, n'estant licite entr'eux de changer de métier ou profession. A Thebes encores n'estoit-il pas permis aux marchands d'entrer aux offices, qu'apres auoir delaisié le trafic par l'espace de dix ans, & ce par loy expresse: & cependant qu'ils sont marchands, s'il y a du vicé en leur marchandise, ils se garderont bien de le declarer, à quoy ils sont tenus & astraits, selon la doctrine,

tant des Theologiens, que Iurifconsultes.

Après ceux-là ie pèse pouuoir mettre la trouppé Forence, gens qui ne sçauent qu'escrire, aucuns si mal, qui donnent double peine à ceux qui viennent visiter. Bon Dieu! quel nombre de gens sont-ils qui cherchent leur viure en vn métier non seulement inutile, mais nuisible. La Iustice est chose sainte & grandement à respecter, mais ie n'ay peu jamais appeler telles gens de Iustice; & pour en parler franchement & rondement, qu'à besoing vne pauvre, voire vne riche partie, de tant de gens qui le plument, auant que d'auoir son jugement? n'en auroit-il pas assez d'un, si on ne luy veut permettre d'agir ou se deffendre luy-mesme? car hors vn protecteur, tout le reste n'est que cabale & galimathias, pour faire valoir ceste mauuaise marchandise. Je ne veux offenser personne, mais ie diray qu'il y a des abus parmy tout cela, qui sont insupportables, des longueurs, des formes informes, (pour lesquelles) ceux qui les cognoissent, & en ont gousté ny veulent plus retourner, je dis ou la Iustice de la part des Iuges, est la plus sincere, qui est au Parlement, où le mal de tels vautours est si grand, qu'il s'est espandu jusques à la suite du Conseil saint & sacré de nos Roys, auquel il se voit d'ordinaire, vn regiment bien complet de chicaneurs, venus de toutes nations, & de toutes langues, qui est la chose la plus honteuse qui se veit jamais: Si ces bouches inutiles s'appliquent à manger le bien d'autruy iniustement, entre les vtils, ou qui le doiuent estre, il y en a qui en abusent tellement, qu'il seroit expedient de leur pres-

erire ce qui, s'obseruoit au Senat des Areopagites,
Qu'ils n'eussent à user de preambules, pour émonuoir les
Juges à compassion ou haine, vice commun à la plus-part
des Aduocats, & où ils en useroient, que l'on les fit taire
par la voix de l'Huissier, ne leur souffrant par ces inepties
& embrouillemens de causes, mais de proposer le fait nuë-
ment & simplement. Vous verriez alors des gens
 bien empeschez de leur contenance, ces vendeurs
 de parolles empoullées, qui plaidans vne cause
 d'vne goustiere, ou d'un euié, font vne legende
 des parties aduerses; & si d'auenture la cause est
 appointée, ils ne se contentent pas de grosses &
 iniurieuses escritures, qui sont de grandes & lon-
 gues inuestiues, mais dressent des Factums, où ils
 font couler de l'ancre destrampée en chaude colle,
 prejudiciable non seulement à l'honneur des par-
 ties, mais d'vne honorable famille, dont ils se pen-
 sent deffendre, sur vne trop bonne opinion qu'ils
 ont de leur capacité, que l'on voit en quelques-vns
 estre entée en pedantisme, ou sous quelque grand
 & large chapeau, qui charge si fort vne teste legere
 qui s'en vale nez au vent, pour lequel retenir, il
 faudroit vn fort canesson, oubliant les reprimen-
 des qu'il en pourroit auoir receuës. Je ne touche
 point aux salaires excessifs, que beaucoup de ces
 gens-là prennent, qu'ils n'ouuriroient pas la bou-
 che, s'ils ne voyoient premierement ouurir la
 bourse; accords & pactions des causes, cela va
 trop loing. Pardessus ceste troupe vile, & inu-
 tile, sont les Juges: desquels par la parolle ex-
 presse de Dieu, tant s'en faut qu'il soit permis de
 médire, qu'au contraire il leur faut, & est enjoint

de porter honneur, respect & obeïssance, bien ce peut-il dire, que c'est chose déplorable, de voir les grandes charges de Iustice exposées en vente, au profit du plus offrant & dernier encherisseur, sans considération d'aage, d'extraction, de doctrine, de service, d'experience, ou de merite en nombre effrené, beaucoup en adolescence. Solon vouloit qu'ils fussent Anciens, d'une vie cogneue, & irréprochable; comment ces qualitez se peuvent-elles remarquer en vn homme de vingt ans? *Quelle raison y a il (dit Vopiso) que l'Empereur face des Consuls, des Ducs, des Iuges, de la vie, merite, aage, familles & deportemens desquels il n'a assurance ny cognoissance.* Et auant luy Platon, parlant du Iuge, disoit, *Comment peut-il iuger, s'il ne sçait enseigner:* de là vient le mépris des Iuges, qui engendre celuy des loix, d'où sont naiz les changemens des Estats. Et puis le grand nombre des parens qui entrent en vne même Cour, contre l'ordonnance, qui n'est point nouuelle, car Aristote remarque en ses Politiques, qu'en quelques lieux le pere, les enfans, & les freres n'entroient point ensemble pour iuger, ce qu'il appelle la plus iuste administration. Dites nous Monsieur *Diaïrete* (qui vous taisez) ce que l'on peut esperer d'un siecle, où la porte est fermée à la vertu, à la doctrine, à l'aage, & aux merites? Je ne puis que dire, respondit-il, & puis ie voy le sieur de la *Prosapsie*, qui a pris la partie contraire, & fait estat de vous respondre: lequel dit. Messieurs vous vous pourriez bien trôper, si vous attendez, que j'excuse le mal qui regne. Ce n'est pas ce que j'ay entrepris, mais seulement que le

Poëte s'est trompé, en l'opinion sur laquelle nous auons commencé nostre discours, ce que voulant soustenir le sieur de la *Timeſe*, & ayant ja fort aduancé, je ſuis content de le laiſſer acheuer : ſi ce n'eſt que ſans l'interrompre, il me ſemble, qu'après que j'auray reſpondu, il nous faudra vn tiers, qui prononce ſon jugement, que nous auons tout trouué en voſtre perſonne, i'en ſuis tres-content (dit le ſieur de la *Timeſe*,) à la charge, que prenant ceſte qualité, de noſtre juge, vous depoſerez celle d'amy, tres-volontiers dit le ſieur *Diaſtete*, & ſur cela le bateau arriuant à bord, ils s'en allerent à l'Egliſe & remirent le reſte au retour, à quoy ils ne manquerent pas, car Veſpres dites, ils vinrent paſſer le trauers de l'eau, & eſtans à bord, le ſieur de la *Timeſe* reprenant ſon discours, dit, j'eſtois demeuré ſur l'abus en la promotion des Iuges, que chacun blaſme ouuertement, car d'en dire dauantage, & venir au fin, la verité n'eſt pas bonne à dire en tout temps; ie me licencieray pourtant de dire que pour des iniures & coups de poing : pour de petites ſommes entre perſonnes miſerables, il ſe faiçt de trop gros procès & trop façonnez, ſi qu'il n'y a moyen d'en retirer ſon argent, j'ay veu des larrons ſurpris ſur le faiçt ſortis impunis, faute de partie ciuile, & pour toute deffence, on dit, où ſont ceux qui vous accuſent? qui eſt vn texte mal & irreligieuſement adapté contre vn larron manifeſte : c'eſt ce qui rend la Juſtice mépriſable & contemptible, & faiçt dire à ces pauures miſerables, les gens de Juſtice ſont tous larrons, & là deſſus vn autre pro-

cés criminel. Il y a d'autres sortes d'Officiers qui manient la bourse, i'ay protesté de ne médire de personne, & quand ie le voudrois ie ne le puis, pour n'en sçauoir point de mal, ie dis sçauoir en termes Philosophiques, mais il ne seroit pas aussi en ma puissance de dénier, qu'à voir la mine, le train, la dépence, les alliances de ces Messieurs, qu'ils ne fassent grandement bien leurs petites affaires, on ne parle plus là que par millions, vn homme de robbe longue qui viura bien, ne paroist qu'vn faquin, vn humeur de frimats, auprès de ces bons Seigneurs, qui ont plus vaillant en vieilles bottes, que n'aura acquis vn homme de doctrine & de vertu en cinquante ans, car quelque chose que l'on die, on ne gangne guere à bien faire, d'en esperer recompence, il n'y faut pas seulement penser: si ce n'est celle des affronteurs de quelque robbe qu'ils soient, qui ayant employé toute leur estude à atraper de l'vn & de l'autre, à quelque jeu que c'ait esté, diront d'vn homme de bien qui n'a eu soin que d'acquérir vn bõ nom, qu'il est vn bon sot. Mais en conscience faisons-nous mieux, ayant l'eslection de nos Magistrats populaires, comment se peuuent tolerer les longues & honteuses brigües, desquelles il faut vser pour y paruenir enuers personnes de peu, les sub-missions qu'il leur faut faire, ie ne pèse pas que cela puisse entrer en la volonté d'vn homme de courage. Les anciens ont tenu, que ces instances & vehementes brigues, ne monstroient rien de bon au poursuiuant. Aristote y remarque l'ambicion & l'auarice, qui (selon Platon) font de perni-

tieux Iuges : pour quoy empescher, il donne vn
 auidis qui n'est pas à mépriser, que l'on oste tout le
 gain que l'on pourroit esperer en ces charges, &
 au lieu de cela, imposer quelque dépense honora-
 ble & memorable aux esleuz, apres quoy, s'il ce
 trouuoit vn briguant, ie porterois courageusemēt
 ma teste, comme faisoient jadis ceux qui propo-
 soient nouveaux reglemens : il adjouste, *Iamais*
une ville ne se porte bien, quand ceux qui entrent en charge
ne cherchent que le profit, il veut que l'on chasse tout
 à fait cet abus : car pour le ballotage que l'on y
 apporte, outre qu'il est mandié, Socrate disoit en
 Xenophon, *que ce n'est pas le moyen d'élire des sages,*
 (il parle plus rudement) *que les Serruriers, Trom-*
pettes, & autres telles gens n'y élisent pas ceux de leur mé-
tier. Ie penserois faire tort à Messieurs les Medec-
 ins que ie tiens personnes doctes de les oublier:
 Nous lisons que les Egyptiens ne guarissoiēt leurs
 maladies que par jeusnes ou vomissemens : qui
 supprimeroient beaucoup de recipez. Platon di-
 soit, *que le plus grand argument d'une mauuaise & sille*
discipline en une republique, estoit la recherche de grands
Iuges & sçauans Medecins : dont est venu ce prouer-
 be, *que la calamité est creuë de la Medecine.* Ce qui fit
 dire à Pline, *que ceste science estoit fort inconstante &*
changeoit souuēt : aussi trouuons nous par escrire, que
 l'on s'en passa l'espace de cinq cens trente cinq
 ans à Rome, que le premier fut vn nommé Ar-
 chagatte, auquel on donna vne boutique, & on
 l'appella blesseur, & puis (pour ce qu'il faisoit
 du mal par feu & ferrement) on l'appella bour-
 reau, & puis multipliers & venans de Grece, fu-

rent chasséz. Asclepiade l'un de leurs coryphées, osta presque l'usage de tous medicamens, & toutesfois il se lit, que Diocles qui estoit sorty de son escolle, ordonna de la chair de chien à quelques malades, en fin ces *Messieurs sont des prometeurs*; (dit le Poëte) or entre promettre & tenir, il y a bien à redire: c'est peut estre ce qui meut lesdits Egyptiens de permettre aux malades, apres auoir esté visitez d'eux, quatre jours, de les admonester, que s'ils vouloient continuer à les penser, ce seroit à leurs risques, moyen de quitter bien-tost le malade & le métier, duquel ils ont faict trois plats, Medecins, Apoticquaires & Chirurgiens, assez mal menez par le Poëte, que ie soustiens en l'une de ses Satyres, car de croire que tous traittent également les malades, sans charlarannerie, ils ne le disent pas eux-mesmes: d'où ie conclus autant d'abus qu'aux autres vacations. Si entre les officiers il y en a qui viuent à gauche, (comme la commune renommée qui à force de loy le tient) ie ne pense pas que Messieurs de l'espée, ces rats de Cour soient sans tache, au moins vne bonne partie d'iceux, bonne mine, bonne piaffe, bien frisez, perruquez, goderonnez, parfumez, le jeu & le bordel fort frequentez, calomnies contre les honnestes femmes qui ne les auront voulu escouter, vantises de celles qui auront esté si fortes que de leur prester, ne point payer ses debtes, quand on est aux champs, faire le petit Roy, lever des contributions sur les vassaux, faire travailler à coruées, frapper l'un, battre l'autre, faire des mariages à leur plaisir, c'est pitié que d'a-
 uoir

uoir à viure avec eux; la guerre vient-elle (comme nous la voyons apprestee, au grand regret des gens de bien, seruiteurs veritables du Roy, de toute sa maison, & amateurs du repos public) il faut capituler avec le Roy, ne le servir qu'en payant, prendre tout pour soy, & appointer ces pauvres malotrus soldats, (reduits à petit nombre) à courir la poulle, & denicher les cochons de nos fermes, n'y rien laisser que ce qu'ils ne peuuent aualler, ou emporter, c'est le rut du baston, & le reuenu de la charge, & le pauvre manant, & sa deplorée famille, courbent sous ce faix insupportable; de se battre ils ont serment de n'en rien faire, & iustement, car à qui en voulons-nous, à qui faisons-nous la guerre? à nous mesmes, cela est furieux, & ne pense pas qu'il y ait bon seruiteur du Roy, qui puisse approuuer que l'on aille égorger ces sujets pour vne nefle, que si chacun nous ressembloit, nous trois, i'oserois bien asseurer qu'il n'y auroit point de guerre, & que le Roy seroit mieux obey qu'il n'est, pour ce que nous n'auons pretentions, desseings, ny enuie sur personne, que ie tiens estre les jouïets de ceux qui demandent la guerre. Reste le dernier Estat en ordre, mais premier en dignité, l'Ecclesiastique. Ie vous supplie Messieurs ne nous flatois point, nous sommes tous trois Catholiques, resolu de mourir tels, (moyennant la grace de Dieu) se peut-il veoir vn plus grand desordre que là, à qui sont donnez les benefices? il est certain que c'est à ceux qui courent le plus viste, & qui sont les plus impudens importuns, on en a de belles prouisions

qui publient les loüanges des pourueuz, desquels ceux qui les asseurent n'oüyrent jamais parler, & sont pour la plus-part faussement alleguées, c'est aujourd'huy l'un des principaux trafics que de benefices, bien esloigné de l'Ordonnance du Concile general de Nice, qui defendoit aux Euesques de changer leur Euesché, ce que Authere Pape leur permit depuis, pourueu que ce fust pour le profit de leur troupeau, non pour le leur, comme saint Pierre vint d'Antioche à Rome, où il n'y auoit que des coups à gagner. Je me raporte à Messieurs les eschangeans (ie ne veux dire acheteurs) s'ils pensent à cela, aussi ne faut-il que voir quels sont les deportemens de ceux qui les attrapent: où sont les gros beneficiers qui preschent, qui facent leurs visites, qui viuent sobrement, qui aumosnent, qui soient hospitaliers, qui ayent soin de leurs troupeaux, qui y resident, & y meinent vne vie exemplaire de sainteté, comment disposent-ils de leurs collations, ordonnent les Prestres; s'enquerent-ils de leurs mœurs, examinent-ils leur doctrine; quelle honte est-ce à l'Eglise de Dieu d'y en voir de si incapables, de si sales, i'ay faiët la protestation que ie reitere, de n'offencer personne en particulier, & de ne rien dire que ce que tout chacun veoit: mais il est bien vray qu'à leur occasion, le nom de nostre Dieu est grandement blasphemé parmy nos aduersaires, ausquels ces Messieurs boüillent du lait sucré: que l'on ne m'apporte point d'excuses, qu'ils sont empeschez delà ou deçà, cela est bon à dire aux petits enfans, la Cour & Paris, n'ont point esté esta-

blis pour repaires de telles gens, il faut resider ou resigner; si ceux qui s'en dispensent, auoient leu que le Flamine Dial dedié à cet Idole de Iupiter, entr'autres choses ne pouuoit coucher plus d'une nuit hors de Rome, crainte que pour son absence, les sacrifices dont il auoit charge, ne fussent mesprisez: ils y penseroient peut-estre, s'il prenoit enuie à nostre saint Pere, de faire ce que son predecesseur Leon I I I I. fit à vn Cardinal Anastase, le degradant de l'ordre sacré, pour auoir esté cinq ans absent de la paroisse dont il portoit le tiltre, bon Dieu que de degradez. Nous lisons qu'en certain endroit de l'Arrabie, il n'estoit pas permis à leurs Prestres de sortir leurs Cloistres, s'ils ne se vouloient exposer au danger d'estre tuez, par le premier qui les rencontreroit, qui le pouuoit faire impunement: & que Platon establisant sa Republique, ne trouua pas bon que les Prestres frequentassent avec le peuple. Pour ceux qui ont plusieurs benefices, il me souuient d'un grand Predicateur, homme de bien de nostre siecle, qui preschant vn iour, dit qu'il ne pouuoit lire qu'à regret les Epitaphes de ces gros Beneficiers, qui se disoient Euesque d'un tel Euesché, Abbé de telles & telles Abbayes, Prieur de tant de Priorez, pource qu'il lisoit la cause de leur condamnation. Quelle proportion y a-il de voir vn Beneficier bien gras, & cent maigres? ceux-là vestus, meublez, nourris delicatement, & montez superbement, & en voir vne centaine qui ne mangent que du pain, & n'ont point de souliers? car pour les autres débauches, ie veux croire ce que l'on en dit plus qu'il n'y en

à, mais ce que l'on en voit, ne laisse pas d'estre scandaleux. Les Abbayes qui ont esté si religieusement fondées, pour y nourrir les Abbez & Religieux, sont quasi toutes en commandes, desertées, delabrées, ruinées, il y pleut par tout, point d'ornemens, ou s'il y en a, tels qu'il font honte à les voir, & ces Messieurs comedent, & passent ioyeusement leur temps, pendant que leurs Religieux ieusnent, prient, ou se débauchent, soit pour n'auoir personne qui les retienne en deuoir, ou pour le recit que l'on leur fait, & qu'ils voyent quelques fois de la bonne vie de leurs venerables comedataires, qualité inuentée par quelques mauuais esprits, pour destruire le saint & sacré ordre de l'Eglise sainte. Je voudrois que Messieurs les Chanoines se souuincés pourquoy ils sont ainsi appelez, qui est pour seruir de regle de bien viure, ie n'entends offencer les gens de bien, mais d'en voir si peu assister au Diuin seruice, & y estant, ne chanter, ne prier voila vne pauvre regle. Que les Religieux de chaque regle lisent la leur, comme ils y sont tenus & obligez, considerent si leur vie y est conforme; ils y verront tant de deffaux, que s'ils pensent à eux, ils en auront honte. Ils se plaindront (& veritablement) d'estre méprisez; mais qu'ils ne s'en prennent qu'à eux, il n'y auroit point de raison d'honorer vn homme à cause de sa charge, de laquelle luy-mesme ne tient compte. Reste l'écume, que la charité bouillante de l'amour de Dieu, a ietté hors du bercail, comme brebis rongneuses, c'est le petit troupeau d'Epicure, instruit en ceste derniere Centurie, par Martin Lu-

ther Moine défroqué, paillard s'il en fust iamais, Jean Calvin Chanoine defaumuffé, & Theodore de Beze Prieur renié, qui ayant eu tels Maistres, ne peut faire chose qui vaille: les petits Ministriaux criaillent pour continuer leur feinte reformation, & ne se contentent de la prescher, mais en font vne article de foy, qui sans passion, merite chastiment, avec la radiation: ces gens qui se disent premiers & plus affidez seruiteurs des Roys, la premiere chose qu'ils font où leur pouuoir s'estend, est d'abolir la Monarchie, & au lieu d'icelle, dresser des Estats & Republiques: ils preschent & soustiennent la liberté de conscience, & là où ils sont maistres, toute liberté est ostée, n'estant permis à qui que ce soit, de seruir Dieu, que selon la frenaisie de ces trois pilliers de feinte reformation, Luther, Calvin & Beze, l'engence desquels ne se peut accorder: c'est yn plaisir de veoir yn Lutherien, estriller vn Calviniste, & avec grande raison: car c'est vne chose intolerable, que le disciple vueille estre par dessus son maistre, quelque brutal qu'il ait esté: mais ce qui est intolerable est la licence que ce donnent ces gens là, d'Imprimer & faire Imprimer toutes sortes de méchans liures, sans en estre recherchez; voyla ce qui ce peut dire le plus modestement de chaque vacation, pour verifier le dire du Poëte.

Mais si vous prenez garde au luxe, où toutes sortes de qualitez trempent, il est si excessif, si extraordinaire, si honteux, si contre Dieu, qu'il y a dequoy s'estonner, de n'y voir point mettre ordre. L'on a tousiours frappé les femmes les pre-

mieres en ceste messée, & à la verité il y a bien de-
 quoy : tant de Dames qui ne sont que pionnes,
 tant de Damoiselles, qui ne deuroient estre que
 chapronnettes, tant de Cordelieres, qui ne de-
 uroient prendre que des foüets, tant de robes &
 jupes de veloux & de satin, tant de broderies, tât
 de perles, tant de pierreries. Où est la loy Oppia,
 qui deffendoit les habits de couleur aux femmes,
 & de porter plus d'une once d'or ? & ce qui est
 plaisant, telle est roturiere de tous costez, qui faict
 sa chambriere Damoiselle, pour faire frotter ses
 patins à la Noblesse, tant de petites coquettes pra-
 riciennes, & marchandettes, vestuë de veloux, sa-
 tin, baguées, caparasonnée, comme les grandes
 caualles : les artisanes avec la soye, tant de collers
 à plusieurs estages ? Par dessus lesquels les hom-
 mes semblent le vouloir encherir, vous voyez vn
 Artisant tout vestu de soye, vn Marchād, les Clercs
 de palais, avec manteaux & bas de soye, robes de
 chambre de soye, à qui en veut porter, ne fut-il
 que rondeur de napes : les Gentils-hommes vestus
 en Princes, quelques vns si lourdement, qu'ils por-
 teront vn moulin sur leurs espaules. L'Empe-
 reur Aurelian ne voulut iamais porter robe
 de soye pure, pource quelle estoit trop chere :
 & aujoud'huy elles sont communes. C'est à fai-
 re à coquins à manger sur l'estain, il faut que la
 moytié, au moins, à aucuns toute la batterie de
 cuisine, soit d'argent, voire à simples Bourgeois
 beau linge, tapisseries, planchers dorez & mar-
 quetez, bref tout reluit : force valets & laquais
 bien couuerts & bien frisez, table couuerte : ce

que comparé avec la frugalité de nos derniers pères, il faut croire qu'ils estoient de pauvre esprit, ou que nous sommes de grands larrons. Platon disoit qu'il estoit impossible, qu'un estat obeïst aux loix, où les habitans employent leur bien & leur temps, en banquets, plaisirs, luxe, & dépenses inutiles & superflus. Où est l'ordonnance de Tacite, rapportée par Vospic, Injonctive d'oster tout l'or, non seulement des accoustremens, mais des chambres, cabinets & couvertures. Tant de loix sumptuaires, *Æmilie*, & autres? mais qui me déplaist sur tout, sont deux choses, ces rotondes, & perruques, par dessus tous, & Messieurs de l'Eglise, & de la Justice, & encores plus à ceux qui sont d'aage. Il fait beau veoir un Ecclesiastique, ou un Juge assis dans son siege, perruqué de quelques cheveux de pendus, de teigneux, ou pestiferé, rotondé, quelque barbe qu'il ait notamment quand elle est blanche? n'ont-ils point entendu dire (car d'estudier ces gens-là craignent de s'y ennuyer) que c'estoit le deguïsement, que ce lascif & vilain Empereur Othon, apportoit pour couvrir sa teste chauue: il y a trente ans que l'on n'usoit point de ces ordures-là, odieuses & abominables deuant Dieu, & le monde. Et les carosses qui s'en vont aujourd'huy si communes que les chambrieres ne veulent plus seruir que où il y en a, qu'en dites vous? N'oubliez vous point le jeu, (dit le sieur *Diaitete*) (non non, respondit le sieur de la *Timefe*, ie le gardois pour la bonne bouche, comme la chose la plus débordée qui se puisse imaginer, on n'y parle que de pistolles, & à milliers, tout chacun

s'en messe, non seulement les grands, obligez de donner bon exemple, mais les petits, qui est le droict & plus court chemin de l'Hospital, & ce qui est plus déplorable, est qui ne se voit point d'aprest à remedier à tous ces desordres & débauches, quoy que pour les entretenir, nous reconnoissons & voyons occulairement, qu'il faut que les hommes prennent des deux mains, ou que les femmes s'engagent corps & ames: car nous sommes en vn siecle où chacun veut estre Monsieur ou Madame, tenir maison, estre braue, & ne rien faire que la débauche & la mine, & voyant cela, ie ne me puis assez émerueiller, comment vous reuoez en doute la verité du dire de ce Poëte, si graue & si sententieux, soustenu par son ancien Homere, qui parlât des enfans, dit qu'il s'en trouue beaucoup de pires que leurs peres, & fort peu de meilleurs: & pour finir ie vous ay gardé vne seule piece qui ne reçoit point de contredit, pour l'autorité de son auteur; c'est Esdras lequel dit clairement & ouuerrement, qu'au siecle affoibly de vieillesse, les maux multiplieront sur ceux qui habitent en iceluy: apres quoy? il n'y a lieu quelconque de doubter, que ce Poëte, n'ait prudemment preueu nos maux, & qu'il n'ait bien & veritablement dit, puis que nous en voyons l'accomplissement, ce que bien pris, demandons nous d'où nous arriuent tant de calamitez, guerres, pestes, & autres iustes punitions, de nos demerites? car voyant le train que nous menons, ie tiens que nous ne subsistons que par miracle, lequel Dieu n'ayant coustume de continuer, il y a grandement à craindre

dre, que la patience échapant, il ne lasche promptement son bras de fer dessus nous; & ne renuerse cet Estat, sans dessus dessous; & ne croyez pas ceste grande ville heureuse par tant de beaux bastimens, que l'on y faict tous les iours, pendant que les bonnes mœurs s'en vont du tout abatuës. Lors le sieur de la *Prosapsie* luy demandant s'il auoit acheué, dit que ce qui restoit de chemin à faire pour r'entrer en la ville luy fermoit la bouche, n'estant raisonnable qu'il parlast luy seul, bien qu'il eust beaucoup d'autres defauts à remarquer en ce miserable & vicieux siecle.

Alors ledit sieur de la *Prosapsie* commença à dire, qu'il recognoissoit ces plaintes non seulement veritables, mais auoir esté prudemment & modestement par luy recitées, pource que toutes veritez ne sont pas bonnes à dire, & toutesfois qu'il est besoin de descouurir vne partie du mal, si l'on en veut guarir: mais que comme il a dit cy-deuant, ceux qui nous ont passez ont eu de pareils accez. Car si vous parlez de la guerre, il n'y a eu siecle, ny nation qui en ait esté exempt: ce seroit vn long discours de vous en faire le recit de temps en temps, non seulement en ce Royaume remply de cerueaux legers, curieux de toutes nouueautez, si vous en voulez croire Cesar, & Vospicque, qui en dit pis, au discours de ce petit tyranneau Procule, que ie ne veux point reciter, puisque tous trois auons l'honneur d'estre nays François, mais bien particulièrement en la minorité des Roys: si qu'ayant veu les quatres années premieres de nostre Roy, paisibles, ie disois que nous auions tout

.sujet de dire; ce que Cassiodore escriuit au Senat
 du regne de la mere de ce Roy Goth. O heureuse
 fortune de ce siecle, de ce que pendant les ébats d'un ieune
 Prince, l'affection de la Roynes mere regnoit, qui compo-
 soit tellement toutes choses, que la charité generale sembloit
 nous couvrir sous elle, nous obeysions à la ieunesse de nostre
 Roy, les bonnes mœurs duquel supleioient sa majorité, &
 nous estoient un souverain & absolu commandement.
 Forme de gouverner à la verité bien nouvelle, & que nos
 successeurs croyront difficilement, qu'un si ieune Roy, ait
 en tant de bonnes conditions, ausquelles les vieillards par-
 viennent avec peine. Nous en rendions graces au
 Roy des Roys, & nous en jouissions, avec espe-
 rance qu'il ne seroit à l'aduenir rien impossible à
 la clemence de nostre Roy, puis-qu'en ses jeunes
 ans, nous l'auons veu si remply de pieté. Ce mira-
 cle doit estre donné (apres Dieu) à la bonté des
 deux, car nous y auons recogneu la mere si pru-
 dente, qu'un Prince estranger si fust soubmis:
 cela la renduë venerable à tous les estrangers, son
 seul regard estant à respecer, & chose admirable
 de l'oüyr parler, elle a respondu de sa bouche en
 toutes oecurrences, avec vne grauité modeste, & si
 familiere, qu'elle a attiré les cœurs non seule-
 ment des presens, mais de ceux ausquels en estoit
 fait le recit: si sa vie est religieuse enuers Dieu,
 ses actions ont eu deux buts principaux, le pre-
 mier à faire que le Roy son fils fust instruit en
 pieté, & recognoissance des biens qu'il a receuz
 de la bonté diuine, le second, que ses sujets se
 rendissent obeissans à ses commandemens: leur
 ayant imprimé ceste doctrine, que le seruice que

l'on rend à son Roy; c'est vne espece de liberté: le tesmoignage qu'il en a rendu par ses dernieres lettres que nous auons veuës escriptes à la Royne sa mere, le desir qu'il dit auoir, de la veoir, pour luy rendre ce que Dieu & la nature requierent de tous enfans, ont tiré des larmes de beaucoup de bons seruiteurs de leurs Majestez, du nombre desquels i'ay esté. I'en parle à cœur ouuert, encore que ie me souuiens bien de ce que Saluste, Caton & Gelle ont tenu; *Les vertus de qui que ce soit paroistre telle, qu'il plaist à ceux qui en escriuent*: mais ce qui me doit garantir de flatterie est, que ie ne dis rien qui ne soit cogneu, si que ie ne crains point que le Roy me dise, ce que Pissennius le Noir estant paruenue à l'Empire, dit à vn qui le vouloit louer, *qu'il employast ce discours pour vn Marinus, vn Hannibal, ou autre braue Capitaine decedé, pour luy donner sujet de l'ensuiure*. Il n'en faut à sa Majesté que les actions de son pere, & les instructions de la mere: & nonobstant toutes ces grandes & heroïques vertus du fils & de la mere, nous n'auons peu nous exempter de quelques souleuemens sur le declin de la minorité de nostre Roy: mais comparez aux semblables sous nos Roys mineurs, n'ont esté que roses, ainsi que le sçauiez mieux que moy; si qu'en cet article i'attens que me donniez les mains, (monsieur de la *Timeſe*) & confessiez que nostre siecle n'est pas si farouche & desobeïssant que les precedens, Dieu ayât tant fauorisé leurs Majestez, que d'auoir rendu ces mouuements morts-nays. Que si les exemples domestiques ne vous contentent; les estrangers en remôtant jusques au com-

commencement de l'Empire Romain, sont si plains
 de seditions, que j'en ay horreur, & sont presque
 incroyables: Ce ne sont esté que meurdres & as-
 sassinats de plusieurs Empereurs, la pluspart le
 meritiens bien, comme vn Heliogaballe, vn Com-
 mode, vn Othon, ce bon vaurien de Neron qui
 entr'autres piperies de son premier Gouverne-
 ment, pour premier mot du guet, donna, *La tres-*
bonne mere, & Dieu & tout le monde sçait, comme
 il la traïta puis-apres, dont il fut bien payé: vn
 Claude si sot, que chacun luy donnoit des na-
 zardes: vn Caligule instruit de jeunesse à toute
 ordure & vilenie, vn Tybere, qui parmy quelque
 chose de bon, estoit vn méchant: d'Auguste mes-
 me, si vous en croyez Dion, rapportant que luy &
 Antoine firent plusieurs meschancetez pour s'e-
 stablir: car pour Iule Cesar, outre ce qu'il estoit
 usurpateur, il se glorifioit, de ce que pour y parue-
 nir, il auoit violé le droit, Vous sçavez le repro-
 che que l'on lny fit triomphant de nos diuisions,
 qu'il y auoit plus de sujet de faire triompher Ni-
 comede, qui se l'estoit soubmis, ie tairay le sujet, il
 est infame, vous le sçavez, il estoit sçauant, mais il
 ne lachoit rien, contre ce qui se remarque de Syl-
 le, (qui tout ignorant qu'il estoit) remit la Dicta-
 ture. Si vous voulez considerer l'estat de la Repu-
 blique Romaine, vous la verrez quasi tousiours
 affligée de guerres ciuilles, entre lesquelles c'est-
 il jamais pratiqué plus de cruantez qu'en celle de
 Sylla & Marius, iusques a auoir faict mourir six
 milles Citoyens: Si les premiers Roys, peu de bós,
 y fut le premier & fondateur, qui commença par

fratricide, rauissement de ses voy fines, homicide de Tassie, qu'il auoit associé de leur part à la Royauté, dont il fut payé comme il meritoit, ayât esté mis en piéces par le Senat, qui ne pouuoit supporter son orgueil. Tulle Hostille consommé par le foudre : l'ancien Tarquin tué par les enfans de son predecesseurs: Seruie Tullie tué par execrable meschanceré de son gédre & successeur, & puis son fils le chassa. Apres eux, Brute & Colatin furent Consuls, le premier poussé d'ambition, força son compagnon de quitter & sa charge & la ville, tua ses enfans propres, les freres de sa femme, sur vn faux rapport qu'on luy auoit faict, qu'ils estoient pour le restablissement du jeune Tarquin, qui le fit mourir en vne bataille en la premiere année de son Consulat. Bref, tout cet Estat tenu pour le plus florissant qui ait jamais esté, ne peut estre dit empiré par successeurs. Les Roys des Grecs, Perses, Medes, & Assiriens n'ont esté guerres meilleurs, si ce n'est que vous en ostiez vn Sardanapalle, qui estoit vn braue protecteur de pufains. Il me semble que monsieur de la *Timese* faict mine qu'il n'entend s'ayder des nations barbares, ains seulement de celles qui ont approché de la raison naturelle du peuple de Dieu : Pour les premiers i'ay dit & verifié que nostre Gouvernement n'est pire que celuy des Romains, mais ie puis dire meilleur : pour les autres, i'ay esté curieux de lire l'Histoire sainte & sacrée, ie n'y ay remarqué que guerres, diuisions & débauches, si peu de bons Roys qu'un esprit foible la lisant (ainsi que nos Religioneux le permettent à tou-

ces sortes de personnes) il y a dequoy murmurer :
 voyla succinctement ce qui se peut dire en general
 des siecles passez. Je viens aux chefs particuliers
 de vostre plainte, qui commence par les enfans
 & seruiteurs, qui (à mon aduis) seroit mieux fai-
 cte des peres, meres, maistres ou maistresses : car
 voustçauz le prouerbe commun, *Tel le Laboureur,*
tel le labourage; La folie est attachée (dit le Sage) au col
de l'enfant, & la verge de discipline la chassera : Vous
 leur desirez vn maistre comme il y en auoit chez
 les Grecs, & ie vous dis qu'ils n'en manquèt point :
 tant de bons Colleges remplis de Gens doctes &
 pieux, anciennement establis & accreus de nostre
 siecle, des Peres Iesuites, où la science des mœurs
 va la premiere, qui est l'instruction que Dieu de-
 mande : si que ie puis assurer qu'Horace ny les
 predecesseurs, n'ont iamais eu de pareils maistres
 à leurs enfans ? Je dis pour ce qui est des mœurs
 ciuilles & de la doctrine : car de Religion, nous
 sçauons qu'ils en auoient tant, qu'ils n'en auoient
 point. Si pour les exercices de la Noblesse, nous
 en auons des Maistres des plus excellens qui furēt
 iamais, entre lesquels sont les sieurs Pluvinel, &
 Benjamin, les maisons desquels font honte à cel-
 les des peres de familles, aux Colleges, ie diray à
 beaucoup de Monasteres, tant la modestie, le res-
 pect, l'honnesteté, & la pieté y sont estroictement
 obseruez. Sur tout cela nos Roys ont eu soin
 principal d'establis vn general, qui est le grand
 Ausmonier de France, place que le feu Roy Hen-
 ry le Grand, remplit du plus sçauant & eloquent
 personnage qui se pouuoit choisir, feu Monsei-

gneur le Cardinal du Perron, peut estre le seul pourueu par merites, entre lesquels non seulement la France, mais toute l'Eglise militante, se doit resouuenir des touches qu'il donna à vn meschant, pernitiex & seditieux liure, intitulé *Del' Institution, usage & doctrine du saint sacrement de l'Eucharistie en l'Eglise ancienne*: hardiment offert aux successeurs d'icelle, & son autheur, en la presence dudit feu Roy, assisté de personnes capables accordées de part & d'autre, où ledit Seigneur Cardinal fit veoir, ce que peut la verité sur le mensonge, par la mort duquel, nostre Roy à l'exemple de son pere, à choisi vn autre de Messieurs les Cardinaux, reluisant en probité & saincteté de vie, pour tenir ceste place, duquel on attend ce qui reste à reformer en l'Vniuersité, & le paracheuement des Escolles Royales, où sont aujourd'huy des plus sçauans Professeurs en toutes sciences qui ayent jamais esté: que l'indisposition de son predecesseur auoit entremises. Vous auez loué la discipline des Lacedemoniens, approuuez-vous le larcin auquel ils instruisoient leur ieunesse? Que si vous venez aux arts de la main, que l'on appelle mecaniques, qui sont les principaux qui nous conseruent, est-il pas vray qu'ils ne furent iamais à la perfection où ils sont? Tesmoin ce qu'escriit Alian des anciens Peintres, qui se mouloient si mal en cest art, (qui est des liberaux pourtant) qu'ils estoient contraincts escrire au bas de leurs peintures ce que c'estoit, vn poisson, vn oyseau ou autre beste: nous auons aujour d'huy nombre d'Appelles, ie puis donc pour ce particulier

dire que iamais on n'eut plus ny tant de soin en l'instruction de la ieunesse qu'aujour d'huy, de quoy ceux qui en sortent font plaine foy.

Ie viés aux seruiteurs, *desquels plus on en a, & moins l'on est seruy*, dit Aristote; pour desquels auoir raison, vous auez desiré l'esclauage, mais en iceluy ne vous souuenez-vous pas combien de fois ils se sont alliez pour assaillir leurs Maistres? Spartac se fit suivre de six mil de telles gens, qui en eussent autant faict à Lacedemone, sans vne leuée qu'ils en firent de 3000. feignant les vouloir enuoyer à la guerre, & les firent tous égorger en vne nuit. L'Escripture sainte mesme les qualifient nos ennemis domestiques: dont il y a infinis exemples au passé, & pour lesquels, maintenir en deuoir, nous auons des Iuges particuliers, qui est tout ce que l'on y peut apporter de precaution: mais ie crains fort que le mal ne vienne d'où ie vous ay dit, des maistres ou maistresses, qui monstrent si mauuais exemple à leurs seruiteurs & seruantes, qu'il ne se faut pas s'estonner, s'il s'en trouue si grand nombre de vicieux, & puis ces bons Seigneurs & Dames qui gaignent si aisément & ioyeusement des boisseaux de pistolles, les tiennent si à leur aise, les montent & menent en carosses, que les personnes modestes ont de la peine à en trouuer & les retenir à petit pot, & en modestie: il est bon de les corriger, mais d'en vser comme faisoient les Romains, les tuer pour vn verre cassé, ou pour en donner plaisir à vn bardache, comme fit Quinte Flamme, les faire entretuer aux Arenes pour amuser vn sot peuple, cela est inhumain.

main : Aussi furent-ils cōtraincts de faire des loix, pour reprimer ces rigueurs, en faire des plaintes au Senat, & de tout cela ils n'en tenoient compte, à cause de leur mauuaise coustume : si que de preferer en cela l'antiquité (ie dis hors le Christianisme, qui nous a tous affranchis) il n'y a pas seulement d'apparence.

Vous avez mis au second lieu les Paysans, & en avez dit ce qui en est : mais ie me souuiens auoir leu dans Iuuenal la mesme plainte, que vous avez faict du larcin ordinaire qu'ils font des fruiçts d'autrui : quelle espee de respect & d'honneur attendez-vous de ceux qui ne sçauent que c'est ? Vous avez souuent entendu ceste maxime, que personne ne donne ce qu'il n'a point : ils sont pourtant si necessaires, qu'Aristote diuisans les Citoyens, ils en fait trois bandes, les Laboureurs les premiers, les gens d'espée & ceux de Conseil. Ils ne sont point autres qu'ils ont esté de tout temps, si ce n'est que les soldats les ayent agueris, mais à leurs despens, & comparant leur vie avec celle des habitans des villes, elle se trouuerra innocente, au moins sont-ils sans ambition, qui est le ver qui ronge quasi tout le monde, le peché du diable.

Vous avez faict suiure les Artisans, avec des plaintes tres-veritables, mais ces gens-là ne travaillent que pour gagner : ils nous preparent ce qui nous est necessaire pour nostre viure & vestement, apres quoy tout le reste n'est que superfluité inutile. Vous m'avez grandement pleu au discours que m'avez faict de la visitation de leur

besongne, où le bourgeois est tousiours attrappé:
 car Aristote en ses Politiques ne l'approuue nul-
 lement, & dit que celuy qui se sert d'une maison,
 en sçait mieux la valeur, que le Masson qui la fai-
 te, le Pilote celle d'un nauires, que le Charpentier
 qui la construict. Pourquoy vn bourgeois qui a
 basti & faict bastir ne feroit-il pas bien ceste pri-
 sée & sans fraiz? mais ie vous entends, c'est autant
 de vuidange de bourse, ce sont cependant mer-
 cenaires, ausquels Dieu commande payer salai-
 re, qui ont atteins aujourd'huy la perfection des
 arts, nous faisans veoir par leurs ouurages mi-
 gnards & élaborés, l'antiquité rustique, comme
 elle estoit, ie ne dis pas en la correction des mau-
 uaises façons, que les Iurisconsultes preferent à
 l'inuention, par vn brocard vulgaire, *Celuy estre
 plus loüable qui corrige subtilement la mauuaise façon, que
 celuy qui est inuenteur de la chose*, mais aussi en l'in-
 uention: car vous sçaués combien nous auons
 de choses nouuelles, non seulement belles &
 vtils, mais necessaires, que nos peres ne veirent
 jamais, i'oserois dire en toutes sortes d'arts
 & métiers: & c'est pourquoy peut estre les An-
 ciens ne tenoient guere plus de compte de ces
 gens-là que d'esclaves, les tenans non seulement
 incapables de toutes charges en la Republique,
 mais aussi de se pouoir dire où qualifier bour-
 geois, se fondant sur ceste maxime, que celuy qui
 par le ministère de sa main traueille pour gagner
 sa vie, ne peut sçauoir beaucoup d'honneur & de
 ciuilité, ainsi en parle Aristote en ses Politiques,
 ce que nous n'obseruons pas. Il pourroit bien estre

qu'en adoucissant ceste rigueur blasmable, les Artisans en auroient abusé, voulans faire les Messieurs, ce qui se peut corriger quand le Magistrat y voudra penser : demeurant nostre institut meilleur & plus humain que l'ancien : mais cependant si ie vous dis que beaucoup de choses anciennes estoient moins parfaites & accomplies que les modernes, c'est ce que le mesme Aristote disoit de son temps : & pour cela Cassiodore dit *l'antiquité rude*, ce qui me fait croire, que nostre Poëte ne l'entendoit pas des Artisans.

Les Marchands marchent apres, desquels vous demeurez d'accord avec Platon, qu'un estat ne se peut passer, il y a eu de tout temps d'honnestes gens qui l'ont esté, entre lesquels ie me contenteray de vous coter Hypocrate, Tule, Solon, & Platon. Vous y trouuez des abus dont ie ne demande point de preuue : mais on en a plus dit anciennement. Il me souuient de la plainte qu'en fait Appulée que l'on luy auoit surfait les necessitez du sextuple : pour à quoy obuier l'on a deliberé en aucuns Estats de mettre prix aux marchandises, mesme sur les hommes, dont ils faisoient traficq, dont nous auons loy expresse au Code de Iustinian. On les a tousiours tenus pour porteurs de delices, consequemment de la ruine des Estats, d'où est nay ce proverbe, *Que les insulaires sont tousiours trompeurs*, pour ce qu'ils sont adonnez plus que les autres au trafic & marchandise : mais que leur vacation ne soit necessaire, penible & perilleuse, ie croy que personne n'en doute. Je pensois que vous leur d'eussiez adjoindre les

Banquiers, bien plus pernicieux aujourd'huy, où l'on fait grand traficq d'argent, & par lequel moyen, Dieu sçait comment on traite ceux qui ont affaire d'argent, vtilement ou inutilement, ce qui n'est pas nouveau: car pour ces abus, nous trouuons que nos Roys saint Louys & Philippe le Bel chassèrent tous les Estrangers.

Après ces deux professions: vous avez mis sur le trottoir ceste belle troupe que vous appelez Forence; vne petite vermine emplumée, qui mort iusques au sang, & à la verité qui auroit mis à part, ie ne dis pas dans nostre ville, mais par toutes celles de France, toutes ces guespes, se seroit chose monstrueuse & déplorable, de voir tant de gens viuans de la misere d'autrui, sans en receuoir autre profit que du papier griffonné, & ce dont ie m'estonne le plus, c'est que les Iuges du Siecle passé, ayant permis à quelque Ministre de Iustice, de se vestir de leurs marques. Vous avez touché vne corde que i'ay entenduë d'un President de Cour souueraine, des plus sçauans de nostre siecle, qui tenoit pour chose injuste, de donner tant de gens à vne pauvre partie, pour la deffendre, il disoit pour la manger. Il y a parmy tout cela des formalitez & longueurs, qui meriteroient bien qu'on en fist quelque reueuë, pour les mettre au néant, que ie ne coteray non plus que vous: mais tout cela vient-il de nostre siecle? n'est-ce pas vne tradition de nos Peres, qui avec trop peu de preuoyance, ont laissé enraciner ce mal que la malice des parties playdantes contre raison & leur propre conscience, forcent bien souuent

ceux qui conduisent leurs affaires d'en vser. Il y a des pilliers de Palais, qui inuentent toutes ces chicaneries, & sont si méchans, que de les rejeter sur leurs Aduocats & Procureurs. Quand à la plainte que faites de la vollée qu'ont pris ce grand nombre de Chicaneurs de toutes nations, pour venir nicher à la suite du Roy, que c'est à la vérité vne chose honteuse & déplorable, à laquelle on attendoit quelque reformation: mais il y a apparence que l'on attendra long-temps. C'est à fin de verifier que la France est subiette de croistre en chicanerie, à laquelle on fait seruir de matiere, tous les plus beaux Edicts de nos Roys, & Reglemens des Cours Souueraines, c'est vn mal dont la plainte n'est pas nouvelle, & duquel vn des sçauans hommes de ce siecle, a fait vn chapitre en l'vn de ces doctes traictez. Vous auez parlé de nostre profession, ce que les gens de bien ne trouueront point mauuais, car de nous exempter du mal, & vouloir que l'on croye qu'elle est immaculée il n'est pas raisonnable. Il y a de grandes lumieres qui rendent vn esclat merueilleux, c'est de ceux-là que ce Roy Goth vouloit que les hauts sieges fussent remplis, dont les voix auoient retenty dans les Barreaux, i'entens en doctrine & l'egalité: car pour les ignorans ou méchans, quelques lettres qu'ils ayent, ie ne prends point la cause de telles gens, qui ne seruent qu'à obscurcir (s'ils peuuent) l'honneur de ceux qui le gagnent au champ d'honneur, desquels il est plus raisonnable que l'on treuve cet ordre, que de ces Chrestelogues, qui prennent toutes sortes de causes,

ſans autre but que d'en auoir de l'argent, que Platon appelle *Marchands Cabaretiers de ſcience*, & deſquels les Ateniens ne ſe vouloient ſeruir en la deſſence des cauſes, ny de leurs finesses & ſubtilitez, qui le plus ſouuent ne ſeruent que de deguiſement & ſurpriſes, ce qu'ils ne peuuent faire qu'ils ne ſoient recogneus, & ne tient qu'aux Iuges qu'ils n'y remedient.

En ſuitte de ce, vous auez parlé d'eux avec le reſpect qui leur eſt deub, & ne penſe pas qu'ils trouuent mauuais ce que vous auez dit. De la promotion qu'on en faiſt trop facilement, les qualitez à conſiderer non conſiderées, & l'ay ainſi entendu de pluſieurs d'entr'eux. Je ſçay bien que Solon ne pouuoit ſouffrir qu'un jeune homme (quelque ſage qu'il fuſt) entraſt au Senar, que Licurgue auant luy auoit compoſé de vieillards: mais que penſez-vous que faſſe tant de jeuneſſe, faute d'eſtre employee, & retenuë en quelque honneſte occupation? elle ſe mettroit à la débauche, d'où arriueroit pis, que d'eſtre promus auant le temps. Nous liſons que l'Empereur Probus donnant la qualité de Senateur à un jeune homme, luy eſcriuit, *Je ne me ſuis point arreſté à voſtre aage, puis qu'on recognoiſt le nombre de vos vertus, & la candeur de vos mœurs*. L'abus que vous y cotez, & que ie ſuis d'accord avec vous, & tous les gens de bien, merite vne bonne & prompte reformation, eſt-il nouueau? Ne liſons nous pas que ſous les Empereurs Conſtant & Conſtance, les premieres charges ne ſe donnoient qu'à prix d'argent, ſans entrer en conſideration de quelque merite

que ce fust? comment est-ce qu'en a vſé ce braue
 Champion de Venus Heliogaballe, qui fourroit
 non ſeulement en l'ordre du Senat, mais aux plus
 grandes charges toutes ſortes de perſonnes, Far-
 ceurs, Artifans, Baladins, Fauçoniſiers, & autres tel-
 les canaille, il faiſoit traficq des charges les plus
 honorables, ſans s'arreſter, ny auoir aucun eſ-
 gard à l'aage, au bien, famille: tout eſtoit en ven-
 te, pour ſubuenir à ſes follies & méchancetez, ou
 de ſes fauoris, rats de Cour? & neantmoins eſtoit
 touſiours neceſſiteux, au contraire de ſon ſucces-
 ſeur, qui donnoit tout, & ne manquoit de rien:
 auſſi auoit-il ſoin des gens de merite & ſçauoir,
 qu'il aymoit, & craignoit qu'ils n'eſcriuiſſent che-
 ſe de luy, qui terniſt ſa reputation: ce qui occa-
 ſionna Demetrie de prendre la protection des
 Atheniens, à fin d'eſtre honoré par leurs eſcrits.
 Belle leçon non ſeulement aux Roys, mais à ceux
 qui les gouuernent, & qui tiennent les premieres
 dignitez. Ce deteſtable Neron faiſoit-il mieux?
 ce lourdaud de Claude? cet infame Caligule? ce
 malicieux Tibere: qui entr'autres y admiſt Flaccé
 & Piſon, pour ee qu'ils beuuoient des mieux avec
 luy? Auguſte meſme pour s'accommoder avec
 Anthoine, & ſon predeceſſeur Iule Ceſar, qui blâ-
 mé d'en vſer honteuſement au profit de perſon-
 nes indignes, comme de ſon Barbier, n'eût point
 de honte de reſpondre qu'il auoit eſté plus aſſiſté
 de telles gens, pour paruenir où il eſtoit, que de
 gens de bien & paiſibles, qui l'auoient obligé de
 les aduancer. Fabie Butée y en meit 177. pour
 vn coup, durant les guerres ciuilles de Silla &

Marie. Ne se mettoient & affommoient-il pas à la volonté de celuy qui auoit le dessus? & les cent premiers instituez, ne traitterent-ils pas leur Auteur, comme vous auez dit? N'auiez vous pas leu en Xenophon l'instance poursuite du fils d'Ariston en l'aage de vingt ans, pour estre le Chef & President de la Republique, dont il fut rudement détourné par Socrate. Aristote parlât de son temps, ne dit-il pas, *Que tous se disoient vertueux, & que plusieurs s'ingeroient d'entrer aux Magistratures.* Si ie vous rapportois les plaintes qu'ont faict les Romains des Iugemens de leur temps, l'un desquels en parle à plaine bouche, & dit que c'estoit vn vray traficq, où celuy qui presidoit estoit au plus offrant de ces sages Atheniens, où les pires voix emportoient souuent les meilleures. Que diriez-vous? Nous n'en sommes pas là en nostre Parlement, (Dieu mercy) lequel nous voyons remply d'un bon nombre de vieux & sages Senateurs, & d'une braue jeunesse, dont les Chefs, & les trois qui ferment ceste Auguste compagnie, (de laquelle & du bien publicq ils sont les conseruateurs) sont recogneus aussi sçauans & preud'hommes qu'il y en ait eu depuis son institution, lesquels si on laissoit faire, i'auserois asseurer qu'ils en contraindroient plusieurs à changer de poil, & faut confesser, que le Parlement de Paris est aussi entier qu'il fut oncques. Quand aux autres, l'esloignement qu'ils ont du Soleil visible de Iustice (qui est nostre Roy) leur peut causer quelque obscurcissement, & donner subject en des rencontres de chopper, & on dit qu'en d'aucuns il n'y a

n'y a guere de moyen d'auoir Iustice, non pas d'un Conseiller partie, mais qui espousera le faict d'une partie, dont estoient nées les euocations de propre faict, pour l'abus desquelles, on a esté contraincts de les retracter : Dieu vueille que le bruiet soit faux, & est plus honnesté de le presumer tel, qu'autrement.

Estant au discours des Officiers vous auez trouué à propos de drapper Messieurs des Finances, où ie croy qu'auiez entédu comprendre Messieurs les Partisans: Ils en sont les Princes (dit le sieur de la *Timeſe*) mais si doucement & si modestement, (au pris de ce que chacun en dit) que ie ne pense pas que les plus mauuais d'entr'eux s'en puissent offencer, ny vous en pourſuiure en Iustice, pour au moins vous en faire faire amende honorable, & peut-estre leur appartenez vous : Il est vray, dit le sieur de la *Timeſe*, mais cela ne m'empesche pas d'en croire plus de mal que ie n'en ſçay, vous ſçauiez (dit le sieur de la *Proſapſie*) qu'il est impossible à qui que ce soit, de manier la poix qu'il n'en tienné quelque chose aux mains, mais cela n'est pas nouveau, puis qu'entre les douze choisis par nostre Redempteur, celui auquel on bailla la bourse (tout prud'homme qu'il estoit) deuint bien tost larron, pour faire valloir le quel métier il vendit iusques à son Maistre, & le nostre: c'est vne soif qui ne se peut estancher que celle de l'argent, plus on a & plus l'on en veut auoir, cela estoit du temps de nostre Poëte, puis qu'il en faict tant de plaintes, de façon que nous ne faisons que demeurer en la traditiue, sans y apporter rien de

nouveau, s'il prennent vn tantet plus que leurs peres & ayeulx, cela ne leur est pas particulier, ils ont bien des compagnons en plusieurs autres vacations; que ie ne veux point particulariser, de peur de gaster le metier: mais ils ont des Iuges qui les espluchent de pres à la redition de leurs comptes. Je ne sçay si vous dittes vray, ou si vous vous moquez; (dit le sieur de la *Timefe*) vous dittes vray! (respond le sieur de la *Prôsapsie*) mais ie ne melle point mon particulier au general; ie reserve cela à vn autre subject. Il y a plus, ils sont recherchez fort souvent avec des rigueurs incroyables, la porte ouuerte aux delateurs, que les bons Roys & Empereurs ont tenu pour personnes deplorees; & puis on vient à composition, ou vn petit nombre faict le faict, c'est à dire charge rudement le commun, prenant ou non, avec vne condition qui ne se peut approuver, qu'il n'est pas permis de renoncer à la grace: quel'on dit leur faire pour crime qu'ils soustiennent n'auoir point commis: & que si par soin, vigilance & bon menage ils peuvent gagner quelque peu de chose licitement, ils trouuent des gens qui disent qu'ils retiennent part; de quoy ils sont assez empeschez de se defendre: de maniere que i'oserois soutenir, que la faulte vient plustost des charges, que des personnes; au moins leur ay ie toujours entendu ainsi dire, en quoy ils ne voudroient pas mentir. Il n'y a guere que l'on parloit d'vne nouvelle recherche; (dit le sieur de la *Timefe*) non (respondit le sieur de la *Diairete*,) mais ie me reserve à vous dire tantost ce qu'il m'en semble. Le sieur

de la *Prosopée* continuant, ie vous diray que l'un de leurs grands maux est l'enuie que l'on a sur eux: car comme vous disiez tantost en vostre plainte generale, chacun veut estre Monsieur, ne faire que iouer, bonne chere, & estre bien braue; on voit ces Messieurs maniant l'argent du Roy, ou de nos rentes, iouir à gogo de ces trois sortes de felicité, leurs maisons mieux parées que celles des Princes, on ne parle que des pertes de pistoles de Monsieur (que i'eusse nommé si l'on n'eust creu que c'eust esté vengeance) & pour cela, ils n'en rabatteroient pas le bec d'un ortolan, ce qui sort par l'esgout de son enuie, couste plus que toute nostre despence à tous trois: cela faict bien murmurer des personnes, mais que pour cela il en doieue eschapper des injures, notammant contre les innocens, nullement? Je suis bien aise que soyons d'accord, en cela pour un petit d'enuie d'auoir veu un petit compaignon qui versoit à boire, ou qui suiuoit vne mulle, ayant mis le nez en leurs papiers deuenir gros Monsieur, il y a dequoy dire trois mots, mais il faut serrer les dents, à fin de ne donner subiect au commun (qui est insolent) de passer les bornes de retenuë, & frapper à tort & à trauers, par les yeux & par tout, tous ceux que l'on rencontre.

Les Officiers passez, vous estes venu au second estat, vne bonne partie duquel vous auez depeint de ses couleurs: mais en auez vous iamais oüy parler autrement; ne tient on pas pour maxime ordinaire que l'espée & la raison ne sont pas logez ensemble, est-ce vne chose nouuelle en no-

stre siecle : tous les precedens n'ont-ils pas fait
mesmes plaintes , notamment des Courtisans ?
cela est sorty de la bouche de la verité mesme , qui
parlant des mols & frisez à dit qu'ils se trouuent
ordinairement aux maisons des Princes ; & des
Roys , ce sont gens oysifs , qui n'ont autre chose
à faire , notamment en ce siecle , où ie ne voy pas
souuent nostre Roy suiuy de Noblesse , assez de gés
d'armes , & peut estre trop , (pour vn si bon Prince
qu'il est) auquel ie crains que l'on celle beaucoup
de choses , entr'autres l'amour que luy portent ses
subjects , qui luy est comme dit Aristote , des bons
Roys , la plus forte & fidelle deffence , Il se passe-
roit , à mon aduis , fort aysément des estrangers ,
mais ce qui m'empesche plus en la deffence du
Courtisan moderne , ie vous confesse que c'est le
jeu , auquel plusieurs d'entr'eux se portent si fu-
rieusement , que si Dieu n'a pitié d'eux , ils y per-
dront argent & entendement : il s'en remarque
desia d'insensibles , cela les jette à l'auarice , à estre
importuns au Roy , ou insupportables à leurs vas-
saulx.

Quand aux soldats , ne sçauiez vous pas que Ce-
sar ne les prenoit ny aux mœurs ny à leur bien ? Ils
sont appointez sur le Cap de Grup , & ne se trou-
uent-là gueres de gens qui portent ordinairement
des moustes , si vous cherchez de la foy & de la
pieté , arriere de là , disoit vn Ancien , & toutesfois
si ie vous dis qu'entre les nostres ordinaires , il y
en a bon nombre qui craignent & seruent Dieu
fort assiduellement en nos Eglises , c'est chose que
chacun voit & qui est grandement à louer , aussi

bien que le bon ordre que nous voyons és Gardes ordinaires de sa Maieſté, plus disciplinez que ne furent iamais les legions Romaines, dont le plus grand honneur, apres elle, doit eſtre attribué aux Chefs qui leur commandent.

Vous avez mis les derniers Meſſieurs de l'Egliſe, deſquels vous avez cotté beaucoup de deffaux en general, ſans toucher le particulier, qui eſt la diſcretion que vous avez faiſt paroître en tout voſtre diſcours, & iuſtement, pour la deffence que Dieu nous a faiſte de reueler la turpitude de nos freres, à plus forte raiſon de nos peres Spirituels, dont nous ne ſçaurions parler avec trop de reſpect, mais pour ce qui ſe voit, & entend de chacun; tant s'en faut que ce ſoit mal faiſt de le dire, que le celer, c'eſt offence: Dieu nous a donné en charge les vns les autres, avec commandement exprez de nous admonester, à la verité les deportemens viſibles de beaucoup de nos Eccleſiaſtiques, me forcent de demeurer d'accord de tout ce que vous avez dit, & de plus: mais dittes moy ie vous ſupplie, où vous voudriez aller pour veoir la Religion ſaincte & Catholique, plus reuerement & deuotement profeſſée qu'en France, & notamment à Paris? Nos voiſins n'ont que mines exterieures, car pour le fonds ne le cherchez pas parmyle commun. Pour les perſonnes Eccleſiaſtiques, depuis le petit iuſques au grand, ſeculiers & reguliers, peut eſtre que la France n'en veit iamais de plus capables: Conſiderez ie vous ſupplie le nombre de Religieux & Religieuſes, auſquels nous voyons prendre la reforme, & viure ſelon

leur reigle, combien de bons & deuots Prestres, combien de sçauans Docteurs, qui preschent & enseignent iournellement, combien d'Euesques, & de plus haute qualité montent en chaire & ne preschent que ce qu'ils font veoir en eux, plus au-sterement qu'il ne vous prescriuent; c'est à l'enuy aujourd'huy qui se reformera, & faut que nous confessions, que iamais nous ne fusmes mieux enseignez de parole ny d'exemple, que nous sommes aujourd'huy. Ceste semence n'est pas iettée parmy des espines, ny sur la pierre, quel nombre voyons nous de personnes laïques qui s'adonnent à la deuotion & tous exercices de pieté & charité? Nous sçauons que toutes choses vieillissent & se dementent de leur commencement: mais les anciens Monasteres se renouellent, nous voyons de nouuelles plantes en la vigne de Dieu, qui fructifient en abondance, en quoy nous voyons la iustification de sa parole estre avec son Eglise iusques à la fin du monde, sans permettre que les portes d'Enfer preualent contr'elle, le saint Esprit prenant plaisir de la perfectionner tous les iours.

Vous auez acheué par l'escume qu'elle a jettée dehors, ce petit troupeau, qui prend tant de peine & court tant de hazards pour se perdre, ne sçauiez-vous pas que le diable a ses Martyrs, qu'il pousse & presse voire iusques à la mort, pour se faire assister là-bas aux flâmes eternelles? n'est-il pas escrit en nostre Loy de grace; qu'il faut qu'il y ait des heresies pour faire reluyre les esleus? la nostre courante n'est point nouuelle, ains vn ramas &

rapetassement des passées: tescmoin la responce où la necessité les a portez, quand ils ont esté pressez de respondre, où estoit leur Religion & qui en faisoit profession il y a deux cens ans, ils ont eu recours aux Albigeois, & faute de ceux-là, il eut falu aller à Lucifer, suiuant leur maxime qu'il faut trouuer vn protecteur tel qu'il soit. Cest à cet Ange tenebreux que s'adreffoit leur Colonel, ce bon moyne déstroqué Martin Luther, pour luy fournir d'argument pour impugner la transsubstantiation. Ils le desauoüeront peut estre: mais si tient-il grand rang entre leurs hommes Illustres, aussi bien que Iean Calvin, & Theodore de Beze, lesquels ils se gardent bien d'auoüer en tout, ils ont esté hommes & disent vray, & des plus imparfaits, (les poëmes du dernier en font plaine foy, pour la belle & honneste instruction qu'ils contiennent) tout ce qui est à deplorer est la liberté que leur sectaires petits Ministreaux, se donnent de prescher à nos portes, escrire au milieu de la ville, des blasphemés detestables contre Dieu & son Eglise, dont le dernier est punissable par la Iustice & non autrement. Depuis peu de jours, vn a bien osé Imprimer cet abominable liure de Bouclier de la foy, avec inscription de son Auteurs, de sa demeure, & de son enseigne: mais il s'est bien gardé de dire qu'il a pris ce tiltre sur vn liure Orthodoxe, imprimé il y a plus de soixante ans. Ces gens-là sont singes, & paroistront tousiours tels, quand bien ils couriroient leur honte d'vne robe de drap d'or. Ils s'en fera quel-

que Iustice quand il plaira aux Iuges, sans enfreindre l'Edict qui porte deffences d'imprimer, vendre ny debiter telles meschantes marchandises dans les villes Catholiques: car si cela demeure impuny, il attirera pis, comme il est ordinaire aux heretiques d'empieter tousiours. Plutarque rapporte, qu'il y auoit vne loy entre les Grecs, qui vouloit toutes sortes de liures, (mesme les bons) composez de tels Autheurs, estre mis au feu, pour abolir leur memoire detestable: la consolation est qu'il n'y a pas apparence que ceste opinion puisse durer encore long temps, elle faict ventre de toutes parts, & puis tant de bons Religieux, sçauans Docteurs, Predicateurs, Pasteurs, Euesques, & autres plus grands Prelats, donnent dedans si rudement à coups de plume, de langue, & de vie exemplaire, que ie voy ces pauvres Ministres au roüet, leurs Auditeurs commencent à se lasser d'eux, & disent tout haut, qui se passeroient bien d'entendre ce qu'ils entendent, qu'en fin leur Religion creuera: mais ce qui les fasche iusques au cœur, est le delaisement qu'en font iournellement des plus sçauans & aduisez d'entr'eux, dont ils se dégorgent à belles iniures, le mal que ie leur veux me puisse auenir, c'est qu'ils se recognoissent, ou perissent, pour ce que demeurans opiniastre, nous auons exprez commandement de les haïr d'une hayne parfaite, par la bouche du Roy Prophete, de ne les hanter ny frequenter, par celle de l'Apostre bien aymé, qui le pratiqua ainsi: car allant vn jour aux bains, entendant que l'Heresiarche Cerinthe, grand Pere de nos pretendus reformez y estoit, s'en

s'en retourna tout promptement, disans, *Fuyons d'icy, crainte que les bains ne tombent sur nous, esquels se baigne Cerinte.*

Ces particularitez touchées, & modestement par vous reprises, vous auez haussé vostre voix, & vn petit aigry vos paroles quant vous estes venu au luxe general, dont nous sommes tous si entachez, que nostre cas est bien vereux, & ie crains incurable, si Dieu n'a pitié de nous: car de quelque costé que ie me tourne, ie ne voy que dissolutions insoutenables, & le pis est, que personne ne se met en deuoir d'y remedier, i'entends de ceux qui y peuuent: car nous en pourrions ieter des plaintes à plaine teste, que nous ny gagnerions rien. Il semble que l'on trouue cela beau & bon: mais comme vous auez prudemment remarqué, il attire avec soy de tres-grands inconueniens, outre l'offence qu'en reçoit sa diuine Majesté, les membres duquel (qui sont les pauvres) seichent sur le pied, ces muguets & muguettes estans si frais & polis, s'il leur faut donner en œures pies, pour le seruice & l'honneur de Dieu, vn tel ton, vous entendez des doleances, des murmures, des grosses paroles, des injures; s'il y eschet; s'il se faut parer, ou sa maison, s'il faut ioïier, ou faire la débauche, rien ne nous couste: j'oserois dire que c'est vn résmoignage de nostre peu de croyance: mais que cela ait commencé en nostre siecle, ce seroit démentir nostre Poëte, qui a si grandement repris ce luxe de son temps, en plusieurs endroits de ses œures, que ie penserois vous faire tort de coter, pour ce que ie sçay que

prenez vn singulier plaisir à le lire, & avec raison, pour ce que ie fais le mesme, non seulement luy, mais i'ose dire tous ceux de son temps, & du precedent. Ne faisoit-il pas bon veoir nos peres vestus à la Suisse avec vne grosse brayette? nos meres vestuës d'escarlatte, la gorge toute nuë, avec leur grosses vertugales? mais le prenant plus haut, il se lit que nos premieres Gauloises portoiēt des colliers, des bracelets & des bagues aux doigts? Les Romains estans en paix estoient excessifs & superflus en despences, ils donnerent entrée aux bombâces Asiaticques, on commença à voir des lits estoffez d'argent, les precieux lodiens & couuertures, femmes lasciuues, Musiciens aux banquets & autres superfluitez; ne faisoit-il pas beau veoir le cabinet de Tybere paré de belles & honnestes figures, par Cyrène, Philene & Astianasse? que dittes-vous de la plainte que faisoit Caton des banquets de son temps, disant qu'il estoit impossible qu'une Cité prosperast, où vn poisson coustoit plus qu'un bœuf: des banquets d'Antoine & de celuy de Cleopatre, où ils alloient à leur ruine à l'enuy. Auant l'arriuée d'Ænée, les Italiens estoient frilez, robbes dorées & autres alechemens a lubricité. Ces sages Atheniens auoient vn Magistrat exprez & particulier, pour condamner en bonnes amendes les femmes qui ne se paroient pas assez brauement. Ce grand Legislatteur des Loërences Zeleuque, permettoit aux femmes de se reiouir, vouloit qu'en ce cas, elles s'habillassent si braues qu'elles voudroient. Les Dames Corinthiennes comment estoient el-

51

les parées? Il n'est pas iusques à Homere qui n'ait dit que les hōmes sōt honorez & renōmez d'estre bien vestus. Denys n'offrit-il pas vne robbe de couleur & à la mode des femmes à Platon? vray est qu'il l'a refusa: aussi dit Aristote, *Quele peuple prend tousiours plus de plaisir à viure profusement & intemperament que modestement.* Il mettoit en ligne de compte le soin de l'ornement des femmes. Ne vous souuenez vous pas que les Ambassadeurs de Combyse estant allez vers leurs voisins y veirent les prisonniers enchainez de chaines d'or, où il estoit plus commun & à meilleur marché que le cuiure. Il n'estoit pas permis aux Ruthenes se vestir que de couleur. Le plus grand soin des Indiens est se parer d'or, de pierreries, & de fard. En Trace les hommes & les femmes sont vestus d'une sorte. En Galathie, les hommes comme les femmes se parent d'or & de bagues. N'avez vous pas leu la moleste des Medes, Perses & Assiriens? il n'y eut pas iusques à Pallas, qui se presentant au Iugement de Paris, (toute sage qu'elle estoit) ne s'atiffa & para, pour emporter le pris de la beauté par dessus ceste lubrique & paillarde Venus: Et qui vous diroit que les neuf Muses estoient filles de joye vous seriez bien estonné, si d'auanture ne l'avez appris de Myrtille & Arnobé. Hyppodame qui a le premier diuisé les villes & citez, trouua bon que les habitans se vestissent brauement & vescuissent delicatement. L'on vante la modestie de Penelope, mais non pas si asseurement, que quelques vns n'ayēt escrit qu'elle estoit vne bonne dame. Estoit-ce pas vne belle gloire à

Cesar de se vanter descendu d'Enée fils de Venus, c'est à dire putain? Ne sçavez vous pas comment ces deux grâds Orateurs Demosthene & Hortense ont esté taxez de leurs habits indecens & effeminez? le reproche que fit le Philosophe Arcefilas à ce riche, delicat & frisé? Vous sçavez les deffences de deux grands Apostres, aux femmes de se parer, comme elles faisoient de leur temps: les grandes & frequentes plaintes des Prophetes, de la curiosité de celles du leur, non seulement en leurs habits & poil, mais en leur marché mol & composé, les menaces qu'ils leur faisoient de la punition qu'en feroit le Dieu viuant. En somme il n'y a eu nation, où ce luxe n'ait abondé, & où il n'y en ait eu plainte, & des Loix & Ordonnances rigoureuses establies pour le reprimer, si que de s'en plaindre, c'est tousiours la mesme chose. Ce que i'ay trouué de plus plausible en vostre plainte a esté les rotôdes & perruques de nos hommes, que ie vous confesse ne pouuoir ny vouloir excuser, mais pardessus tous à nos vieillards Iuges & Ecclesiastiques. Je sçay bien qu'en plusieurs nations il estoit honorable de porter les cheveux & la barbe longue, la tonsure estoit vn signe de seruitude; c'est pourquoy Licurgue (quelque rigoureux qu'il fust) trouua bon que les jeunes gés laissassent croistre leur poil, comme chose qui les rendoit plus hauts & plus à craindre. Le Rethoricien Castricie, voyant quelques siens escolliers Senateurs(nottez) mal vestus & mal chaussez, les en reprit. Mais de chercher des cheveux d'autrui tels que les auez veritablement dépeints, cela ne

se peut tolerer, *Aux hommes lesquels vn Ancien disoit pouuoir estre trompeurs par tout quand ils commençoient par la teste, il ne se voit point de perruqué qui ne soit basteleur,* (dit le prouerbe) infinis brocards se trouuent escrits contre telles gens, l'vn desquels Iuge (nottez) qui n'estoit pas perruqué, mais qui simplement auoit colloré son poil, fut demis de son Office par Philippes de Macedone. Il y en a qui donnent l'honneur de ceste ordure à cet infame Othon, d'auoir pris le premier la perruque pour cacher sa teste chauue, comme au contraire, il se faisoit raire la face tous les jours & frotter de pain rosty, de peur que l'on creust qu'il eust de la barbe, au modelle duquel nous auons beaucoup de gens qui se gouernent: mais n'en desplaise à ceux-là: car Xenophon rapporte, qu'Astiages estoit paré de ce bel ornement, & adjouste à la mode des Medes, mols, comme ie vous ay dit, par dessus tous les peuples. Voyla les patrons de nos perruquez, & si souuent barbe-rasez, avec la rotonde d'vne femme, que ie vous confesse que ie ne sçay à qui me tenir à Democrite ou Heraclite, quand ie les voy, ils me font souuenir de ce qui se raporte des Indiens, où les hommes tortilloient leurs cheueux, ne bougeoient de la maison pour se parfumer, où les femmes se tondoient, auoient la dague sur le rognon, & s'en alloient trauailler aux champs. Ie leur desirerois vn Caligulle à la rencontre, pour les decoiffer, disant qu'il falloit estre modeste ou Cesar, c'est à dire à sa mode, à qui toutes sortes d'impudences estoient permises: aussi estant repris d'Anthoinette son ayeulle, il respond & courageuse-

ment, souuenez-vous que toutes choses me sont permises
 & contre toutes sortes de personnes: Il estoit si abomi-
 nable d'abuser de ses sœurs comme de garces, il en
 retira vne, Drusille, des mains de Cassie le Long
 son mary, pour l'auoir à femme: c'estoit vn infame
 villain. Il n'y a pas vingt ans que ce sale or-
 nement est arriué, qui a si bien profité que le mé-
 tier n'en vaut tantost plus rien, tant de gens s'en
 messent d'en porter & d'en vendre, iusques à en
 auoir faict maistrise, escrite en grosses lettres, au
 lieu le plus eminent de Paris. Nos peres n'auoient
 point d'inuention à faire des métiers, on m'a dit
 qu'il y a memoire donné pour en faire vn de sis-
 fleur d'oyseaux, i'oserois bien asseurer qu'il sera
 le tres-bien venu, & encores le mieux receu.

Vous ayant respondu par ordre à toutes vos
 plaintes, & iustificié qu'elles ne sont pas nouuelles,
 mais qu'elles ont esté en tout temps, & avec plus
 de raisons qu'au nostre, ie ne pense pas perdre ma
 cause, en laquelle auant conclure, ie vous prie me
 permettre de vous proposer sommairement (&
 sans vous ennuyer) les loix & façons de faire des
 Anciens peuples, pour comparez avec les nostres,
 (que sçauiez mieux que moy) juger s'il y a subject
 de dire que nous sommes empirer, & irons
 tousiours en empirant. Parlons de nous les pre-
 miers, estoit-ce pas vne belle coustume d'affom-
 mer celuy qui arriueroit le dernier au Conseil, de
 sacrifier des hommes comme faisoient noz an-
 ciens, iusques au temps de Tybere. La belle mar-
 chandise que Suetone dit, ce braue Capitaine Ce-
 sar y auoir acheptée, qu'ils presentoint de l'argét

à rendre quand on seroit aux Enfers, croyās l'immortalité de l'ame, & que l'on y en auoit besoin. Nous auons esté accusez il y a long-temps d'estre difficiles à manier, prompts à rebequer contre nos superieurs, Lampride nous gratte où il ne nous doit pas demanger. Si vous prenez l'Empire Romain, qu'elle concorde y trouuez vous pour vn qui aura esté en paix, cent se sont massacrez, & est chose admirable quelles sortes de gens s'y sont introduicts, comme ils s'y sont gouuernez, plustost comme diables que comme des hommes: qui a donné subject à quelques vns de croire, que ce monstre de nature Neron estoit l'Anti-Christ qui doit venir, dont nos Religionnaires ne tomberont aysément d'accord, qui en mettent vn grād nombre, contre le texte de l'Escripture, qui le predit singulier, s'ils ne se mécontent qu'à cela, il seroit aysé de leur faire recognoistre leur erreur. Vn jadis des leur qui a recogneu la verité les a proprement estrillez là dessus, dont ils n'ont garde de se vanter, voyla que l'on gaigne à battre glorieux. Si vous considérez les anciennes façons de faire de leurs bons amis, nos anciens & jadis plus cruels ennemis bien que voisins les Anglois, ne trouuons-nous pas escrit que du temps de Cesar ils n'auoyent qu'une femme pour dix ou douze, ne se vestoient que de peaux, qu'ayans vescu certain temps ils se faisoient mourir. Les Hibernois forçoient leurs malades de se laisser mourir. Sainct Hierosme raporte qu'il a veu des Escossois leurs voisins manger des hommes en nos Gaules. Les Espagnols laissoient la charge de

leurs maisons à leurs femmes, & s'en alloient voler & brigander. Les Allemans estoient à la verité gens de guerre, mais grands volleurs. Les François ne tenoient le blaspheme & le larcin que peccadilles : Y eut-il iamais peuple plus ambitieux, auaritieux & voluptueux que les Romains, estant mesme au sommet de leur grandeur, qui fut sous Trajan ? Qu'estoient leurs jeux publics sinon vne Escolle ouuerte de paillardise ? ne faisoit-il pas bon veoir les jeux Floraux celebrez par les femmes de composition, en memoire de Florá l'une des fortes putains de son temps, qui donna tout le gain qu'elle auoit fait à la sueur de son vilain corps, au peuple Romain qui l'accepta, remercia & honora come vne belle Déesse ? Les Italiens ne firent-ils pas tuer & brusler les Pythagoreans pour auoir voulu apporter reforme en Italie ? Ces sages & sçauans Grecs, comment se gouuernoient-ils ? n'y a-il pas de quoy rire de la dispute qui fut entre les hommes & femmes Athenienes à qui nommeroit la ville, nommée par les femmes pour l'auoir emportée d'une voix, les hommes la voulant nommer Neptune, dont irrité esmeut la mer, pour raison de quoy il salut capituler. Estoit-ce pas vne belle loy entre celles de Solon, la permission aux femmes qui ne se contentoient de leurs maris, d'en choisir l'un des parens de leurs maris pour venir coucher avec elles ? Platon qui en estoit ne faisoit-il pas vne belle Republique, où il establissoit les femmes & les enfans communs, ne trouuant pas à propos qu'un pere peut recognoistre son enfant, ny l'enfant son pere. Lycurgue
auoir

auoit-il mieux faiēt à Lacedemone donnant pareils & semblables exercices aux femmes qu'aux hommes, iusques à les faire luter nuds & nuës ensemblément & combattre à cheual? En vn mot Thucidide rapporte que peu auparauant luy, en toute la Grèce le brigandage n'estoit point méprisé, si que les voyageurs se rencontrans, la premiere salutation estoit, Messieurs estes vous brigands? aussi Platon & son disciple Aristote ont mis ceste belle qualité entre les permises; que là estoit ordinaire de bannir les plus gens de bien aussi bien qu'à Rome. Ce seroit chose longue & ennuyeuse, de vous coter plus particulièrement les sortes, voire infames coustumes des nations & conditions méchantes des plus qualifiez d'icelles, comme des Scithies qui se vestent de peaux d'hommes courroyées, & se seruent de testis au lieu de coupes. De l'inceste ordinaire des Perses entre les meres & leurs enfans. De la quantité de femmes qu'ont les maris, & de maris qu'auoient les femmes en Mede. Entre les Nasamones, que l'Espouse prioit tous les conuiez aux nopces, de se venir resioiir avec elle, pendant que les autres danseroient, celles des Assiriens de vendre les belles filles, pour auoir dequoy marier les laides, comment les Roys d'Afrique auoient tousiours des harats de femmes: qu'un Roy des Parthes nommé Herothime auoit six cens enfans. Sureue general de ceste nation qui vainquit Crasse, auoit dix mil femmes: comment le Roy Deiotare tua douze de ses enfans, pour asseurer son Royaume au trezième. Les successeurs d'Alexandre s'entre-

ruoient iusques aux femmes, meres, enfans: car
 quand aux freres c'estoit chose cōmune: & qu'en-
 tre les premiers hommes, au recit de Plutarque,
 le plus grand point d'honneur & de vertu fut de
 massacrer, tuer, ruiner les hommes, ou les rendre
 esclaves. Mais quelle plus grande folie de la di-
 uersité de leurs Dieux? Apollon Dieu des deuins
 se laissa tromper à Leomedon. Iuppiter le grand
 des grands, ne guarissoit point les maladies, il fal-
 lut recourir à Esculape; & ce qui est admirable
 est la diuersité des opinions des plus sages, sur ces
 beaux Dieux de paille. I'adjousteray pour fin ce
 que disoit le Roy Prophete de son temps, que les
 veritez estoient diminuées entre les enfans des
 hommes, qu'il n'en trouuoit pas vn seul qui fist
 bien; Dieu mesme estant au monde visible ne
 vouloit pas prier pour le monde. Le fraticide
 commis par ce méchant Cain sur son frere inno-
 cent Abel, & dans le peuple de Dieu. Apres cela
 ie ne sçay qui pourra soustenir l'opinion de no-
 stre si sçauant Poëte, & dire que nous sommes en
 vn siecle pire que les precedens. Quand à ce que
 dit le Prophete Esdras, il ny a rien de plus verita-
 ble, il preuoyoit la méchanceté de ce peuple, de-
 uoir venir iusques au comble, en faisant mourir
 le Messie, vray Fils de Dieu, ce qui a esté y a long-
 temps executé. C'est à vous (seigneur de la *Ti-
 mese*) de penser à vos repliques; certainement, res-
 pondit-il, vous m'avez vn petit estonné de vostre
 agreable discours, auquel ie pourrois pourtāt bien
 repliquer quelque petite chosette, mais la bien-
 seance veut que monsieur *Diatete* nostre confre-

re & bon amy, qui nous a si courtoisement & patien-
 nement entendus & au jugement duquel nous
 nous sommes remis (joinct que nous approchons
 de la ville) prononce sur nostre different, à quoy
 il fit responce selon sa modestie accoustumée, que
 l'on l'auoit bien empesché, toutesfois qu'ayant
 accepté ceste charge il s'y trouuoit engagé de re-
 putation, qu'il estoit content d'en dire quelque
 chose, à la charge que l'on luy pardonneroit en
 ce qu'il n'agreroit pas, & pour ce faire requist les-
 dits sieurs de la *Timese* & de la *Prosappie*, de se seoir
 sur l'herbe à l'entrée des allées de la feuë Royne
 Marguerite, lieu fort à propos pour auoir esté
 planté par le commandement d'une si sçauante &
 eloquente Princesse, en laquelle auoit pris fin la
 race Illustre, vaillante & pieuse des Vallois: ce qui
 luy fut accordé tres-volontiers, y ayant encores
 pres d'une heure de loisir iusques à la retraicte.

Messieurs, dit le sieur *Diaitete*, i'ay dequoy vous
 remercier & me plaindre de vous deux, au pre-
 mier de m'auoir honoré de la qualité de vostre
 Arbitre, dont Aristote a fait grand estat, au secōd
 de m'auoir imposé vne charge sans auoir obserué
 ce que vous a prescript le Poëte, cause de vostre
 question, quelle est ma portée. On dit que les plus
 grands esprits ont accoustumé de proposer &
 soustenir les paradoxes; vostre questiō est appelée
 des sages (vos semblables) vn discours non pas
 contention, pour dequoy vous dire quelque cho-
 se qui vous contente: l'aurois bien besoin (comme
 disoit Platon) de la capacité & eloquēce de ces
 Messieurs nos confreres, qui honorent le barreau

le plus Illustre du monde, ce que ne pouuant faire aysément & dignement deuant les maistres du métier, comme nous sommes icy familièrement & priuement, aussi vous contenterez vous d'un mot de mon aduis en termes communs & familiers. Ayans entendu les doctes & pertinentes raisons de vos opinions, admiré vos modesties, avec lesquelles, vous Monsieur de la *Timese*, auez cotté plusieurs deffaux, que vous pouuiez bien accroistre avec verité: & vous monsieur de la *Prosapie* a les excuser par infinis exemples, pires que nous en fournissent les histoires, tant sacrées que prophanes; qu'il seroit perilleux de remettre deuant les yeux à beaucoup de nos esprits trop esueillez & enclins à les imiter. Il me souuient de ce qu'aucuns ont rapporté de l'un de nos plus grand Roys, qui estât allé tenir son liêt de Iustice, où elle se rend entièrement, en nostre Parlement, apres auoir oüy l'esclat de deux grandes lumieres plaidantes, se trouuant empesché pour qui prononcer, dit, qu'à son aduis le premier auoit bonne cause, & que le second n'auoit pas tort. Iugement à mon aduis le plus juste & equitable qui se puisse donner en la question agitée: de laquelle pourtât, ie suis honnestement & ciuilement obligé vous entretenir vn quart d'heure. Vostre plainte (Monsieur de la *Timese*) a esté fondée sur la misere de nos derniers mouuemés, & apprehension de ceux que nous voyons à venir: cela prouient d'un estomac François, qui sçait qu'en guerres ciuiles routes choses sont miserables, & dont nous en auons veu & entendu des rigueurs insupportables,

ce que ne vous contredisant, Monsieur de la *Prosopie* vous a dit, que c'estoit l'ordinaire de la guerre, que Cassiodore (que vous avez cité) appelle *un conseil barbare, un cruel secours, & un debat plustost brutal qu'humain*: que la ressource des maux passez ne nous doit estre si piquante, puis que nous auons dequoy nous consoler en nos semblables, vous me direz que c'est la consolation des misérables, il est vray, mais encores y a il cela de plus (comme a dit Monsieur de la *Prosopie*,) que ce qui est arriué depuis quatre ou cinq ans, a esté doucement conduit, si qu'il n'a pas esté jugé guerre, mais mouuement, vn accez & non vne maladie, dont l'honneur est deub à la bonté de nostre Roy, & prudente conduite de la Royne sa mere, laquelle (pour vser des termes de nostre mesme Auteur) ayant perdu le support de ce grand & inuincible Roy son mary, à courageusement pris la charge & du Roy, & du Royaume, ou il faudroit que ses ennemis (si elle en pouuoit auoir) confessassent ses deportemens si doux, qu'il ny a histoire qui en produise de meilleurs: cela donc comparé aux guerres qui ont passé, n'est ou rien, ou peu de chose. Quand à ce qui se presente, ie ne me puis imaginer que cela passe bien auant, me fondant sur le seul bon naturel de nostre Roy, qui tient de ligne de pere & de mere, qui nous est vne assurance, que n'aurons point de mal: car si ainsi est que la memoire des vertus des peres vertueux, aye conserué l'affection enuers les enfans mesmes vitieux, comme celle du grand Cyre à Cambise, duquel le peuple auoit tant de respect, qu'il

en fauorisoit les grands nés, celle de M. Aurelle à l'endroit de son fils Commode, surnommé Incommode (bien qu'il n'ait esté tenu par quelques Historiens, ny trompeur, ny malicieux, mais simple & ouuert par dessus tous hommes :) que de uons-nous esperer & asseurer de nostre Roy, estant né de tels pere & mere, & se rendant imitateur de leurs vertus & de bonnairitez? que les fins fassent ce qu'ils voudront, ils ne scauroiét faire faire mal à ce jeune prince, à Monseigneur son frere, & à mes-Dames ses sœurs, ce sont fruiçts de trop bon arbres, ils n'aigriront point, & ne doutez que ce ne soit leur plus grande gloire. *Ils sont bons pource qu'ils viennent de bons*, disoit Platon. Il scait que c'est chose execrable d'vser de force contre sa mere, qui par toutes sortes de loix, ne scauroit donner sujet quelconque à ses enfans d'armer contre elle, que c'est pour sa manutétion que Dieu & la nature l'obligent d'exposer sa vie, que ceux qui font autrement ne meritent pas de conuerfer avec les hommes, croyez vous pas qu'il est instruiçt plainemét en la loy de Dieu, qui luy commande ce respect, comme à ses Lieutenâs? & qu'il n'ait entendu qu'entre plusieurs loix que Cerez donna aux Atheniens, les trois derniers obseruées furent, l'honneur des Dieux, la reuerence des parens, & l'abstinence de la chair. Que de uons-nous craindre de mal du costé de la Roynne sa mere, outre le bien qu'elle nous a causé & fait, sa seule qualité de mere nous en doit oster tout soubçon. Quand Dieu a voulu asseurer sa misericorde, il a pensé ne le pouuoir plus effieacement

faire entendre qu'en nous disant, que si la mere oublioit son enfant (comme chose inouïe) que pourtant il n'oubliroit point les siens. Il ne se peut ny doit attendre rien de mal de sa part, son naturel estant tout bon, plain de respect enuers le Roy son fils, & d'amour enuers son peuple, pour le salut duquel elle a rédu des-ja infinies preuues, d'où nous auons grand sujet de remercier Dieu de nous l'auoir donnée pour le reestablissement de cet Estat. Il est vray que i'entends des gens qui n'osans gronder contre elle (quelque bonne enuie qu'ils en ayent) se jettent sur le sieur Duc d'Espernon, & Dieu sçait comment ils le drappent. Pour moy ie ne suis point à ses gages, & ne me mesle nullement des affaires d'Estat, mais si par les actions passées, l'on peut asseoir quelque jugement de celles à venir, outre ce que ie soustiens qu'il ne peut, ny doibt desobeïr au Roy, comme estant son sujet, encores moins s'opposer à sa puissance & à ses commandemens, j'oserois bien asseurer qu'il n'en a point de volonté: car quelle apparence y a il qu'un Seigneur de sa qualité, de son aage, le plus ancien Officier de la Couronne, de son experience, de sa prudence, de sa valeur, de ses moyens, de ses seruices, fils d'un des plus vail-lans Seigneurs de France, des plus affectionnez seruiteurs de ceste Monarchie, & pere de trois jeunes Seigneurs qui ne promettent rien moins que de degenerer du lieu dont ils sont yssus, qui n'aspirent, ny respirent que les bonnes graces du Roy, qui aymeroient mieux mourir en icelles que de s'en veoir priuez, fasse naufrage au port

entreprenât quelque chose contre le Roy & con-
 tre l'Estat? Il faudroit estre priué de sens commun
 pour le croire. Que l'on ne dise point ce sont pa-
 roles, ce Seigneur à tant rédu de preuues de sa va-
 leur & de son affection enuers les Roys & l'Estat,
 qu'ils ne se peuuent non pas dénier, mais ignorer
 par qui que ce soit. Que l'on s'imagine, que l'on
 pense, que l'on dise tout ce que l'on voudra, nos hi-
 staires publieront la valeur, le courage, la bõne vo-
 lonté & les bons effects de ce braue & sage Sei-
 gneur, ce sont qualitez que ie luy ay entendu don-
 ner par des partisans de ses ennemis, (comme la
 vertu n'en manque iamais non plus que d'enuie.)
 Il est grand, les seruices & merites des siés luy ont
 ouuert ceste porte, il y est entré par le jugement
 d'un des plus grâds Roys que nous ayons eu, il s'y
 est conduict & comporté de mesmes, & faut qu'il
 y meure sans qu'il luy puisse venir en fantaisie d'en
 reculer vn seul pas: car d'assister & seruir la Roy-
 ne mere du Roy, ce n'est pas crime, mais vne
 action toute plaine d'honneur, & qu'un bon fils
 (comme est le Roy) approuuera tousiours & re-
 compensera. C'est pourquoy tout cela bien con-
 sideré, il n'y a pas seulement lieu d'apprehension
 de ceste guerre, que nous voyons tourner en ren-
 fort d'amitié & de bien-veillance entre leurs Ma-
 jestez sacrées. Pour les plaintes particulieres que
 Monsieur de la *Timese* a faictes, si veritables, & les
 pertinentes responses de Monsieur de la *Prosapsie*,
 vous en auez si doctement, & cordialement parlé
 tous deux, que ce que i'en pourois dire ne paroi-
 stroit gueres, & ne seruiroit que de vous ennuyer,
 vous

vous vous estes plaint (& iustement) de la mau-
 uaise conduitte des enfans; mais vous sçauiez que
 Platon les dit, *plus forts à diure que les bestes*: les pe-
 res & meres en deuroient auoir plus de soin, &
 quelques modestes qu'ils soient leur empescher
 (comme dit Xenophon) la frequentation des mau-
 uaises compagnies, qui est leur ruine aussi asseurée,
 comme les bonnes leur sont exercices de vertu,
 pour à quoy se former, i'ay veu vn Arrest donné
 par le feu Roy Henry second, en son Conseil, le-
 quel meriteroit bien quelque rafraischissement,
 par le commandement de sa Majesté, qui en seroit
 d'autant mieux receu, qu'il en montre l'exemple:
 i'ay tant pris de plaisir à le lire que ie le vous veux
 reciter, voicy ce qu'il contient.

LE Roy considerant que la benediction paternelle assure
 les fondemens de la bonne edification, & promotion
 en tous biens, tant corporels que spirituels de ses enfans,
 ainsi que nous ont montré par bon exemple, & ont fait nos
 anciens Peres & Patriarches, & que la nuit & le som-
 meil que nous prenons en icelle, nous represente nostre mort
 & derniere dormition, qui ne se reueillera iusques au iour
 de la Resurrection generale; & ordonné & ordonne, que
 tous enfans demeurans avecques leur pere & mere, seront
 tenus de se presenter tous les soirs, auant que se retirer
 pour aller coucher, à leursdits peres & meres, à deux ge-
 noux, leur demandant humblement leur benediction pa-
 ternelle & maternelle, & pardon de toutes offences. Et
 aussi enjoingt ledit Seigneur à leursdits pere & mere de la
 leur donner & octroyer beneuollement & gracieusement,
 quelque offence que lesdits enfans leur ayent faicte, i'entēds

quant à la rancune de vindication, autrement & a faute de ce vouloir faire humblement & gracieusement, tant de la part desdits enfans, que desdits parens, ledit Seigneur en contumace & perseuerance d'un mois, les a declarez priuez des successions & hereditiez l'un de l'autre, sçauoir le parent s'il tient à luy de l'heredité de leurs enfans les predecedens, & les enfans fiers & orgueilleux, contēpreurs de leurs pere & mere, priuez des biens & succession d'iceux: & ordonne que ce qui autrement leur ont appartenu, sera saisi comme bien vacant, & confisqué audit Seigneur, pource que c'est en vertu de ceste presente ordonnance: veut & ordonne, que les enfans des Princes du sang, & Roys, soient compris en ceste ordonnance, pour les maintenir en humilité magnanime, le fondement de laquelle est de craindre & reuerer leur pere, apres auoir fondé la crainte & amour de Dieu le Createur, ainsi qu'il est escrit, *Timor Domini initium sapientiz*, si enim ego pater, vbi est amor meus: a adiousté & adiousté ledit Seigneur ce cas d'ireuerance, ou contumace arrogante, au quatorze causes d'ingratitude, pour lesquelles par disposition de droit commun & raison escriite, les enfans peüient estre exheredez par leur pere ou mere, de pareux offencez.

Cela estant bien obserué, il faut croire que Dieu y apportera sa benediction, laquelle arrousee de la bonne doctrine de tant de bons Maistres que nous auons aujourd'huy, accompagnée du pouuoir des Iuges, pour sacher les mauuaises herbes, qui croissent pres de ces jeunes plantes; c'est à dire retrancher leur trop de licence, comme ce qu'il leur est le plus contraire, & ainsi verrons cesser l'effect de la plainte de Monsieur de la Rimefe: &c

pource que de ce fondement bien jecté, dépend
 toute reformation : le ne reprendray rien, de ce
 que vous auez parlé des charges & fonctions de
 chacun en particulier, pour estre tous deux de-
 meurez d'accord, des abus qui y sont, dont la faute
 (à mon aduis) ne peut estre donnée, qu'au banis-
 sement qu'on a faict des deux pierres fondamen-
 tales de tous Estats & Republiques bien ordon-
 nées, La Recompense des bons & vertueux, & la
 Peine des méchans & inutiles, il n'y a culture des
 mœurs si profitable, que la recognoissance des
 merites; Ostez, dit le mesme Cassiodore, la crain-
 te du mal, & la recompence de la vertu, tout s'en
 va en confusion : le bon traitement que l'on faict
 à la probité, jointe à la capacité, est vn tesmoi-
 gnage indubitable d'un bon gouuernement : car
 outre que faisant autrement, on oste tout coura-
 ge de bien faire, & ouure-on la porte aux plain-
 tes, il y a de l'iniustice, difficile à supporter à vn
 homme de merite, de veoir aduancer vn homme
 de peu, & souuent de neant, par dessus luy, & est
 l'un des plus grands pronostiques de changement
 d'un Estat, non pas que ie vueille dire, qu'il ne
 faut estre vertueux & preud'homme que pour
 esperance de loyer : car qui ne butteroit que là,
 pourroit aussi se faire méchant pour recompense :
 Il y a plusieurs sortes de récompenses, les moin-
 dres & desquelles la vertu faict moins de cas, sont
 les profitables : Il y a les honorables, qui sont
 pour les courageux & fils aînez de la vertu, c'est
 là qu'ils prennent leur preciput & aduantage, peu
 d'argent & force honneur, contente grandement

un honnesté homme : mais quoy , comme vous
 auez tous deux reconnu , tout est à prix d'argent ,
 si que nous pouuons dire que les compagnies
 sont remplies d'escus , & non pas d'hommes : ie
 sçay & recognois de braue jeunesse , mais que ie
 puisse croire qu'elle doieue tenir les grandes &
 importantes charges , comme de Iuges , ie ne le
 puis pas seulement penser. Platon dit , & person-
 ne de sain jugement ne le contredit , que trois
 choses y sont necessairement requises : l'experien-
 ce , la prudence , & la raison , cela est , ou peut-il estre
 en la jeunesse ? le plustost que l'on les y ait admis
 anciénemét , estoit en l'age de tréte ans , qui estoit
 auparauant de trente cinq , dont ie ne me rapor-
 terois pas à leur serment , comme l'on faisoit an-
 ciennement aux Iuges Hobiastes , qui (entre au-
 tres clauses) affermoient auoir passé le trentiesme
 an de leur aage : ce n'est beaucoup attendre que
 ce temps là au plus pressez d'aller à coups de pi-
 stolles : car par vertus & merites , c'est trop tost.
 Si nous estions au temps de Xenophon , nous
 nommerions enfans iusques à 17. ans , jouuëceaux
 iusques à vingt-sept , hommes iusques à 52. & c'est
 en ce dernier aage que l'on commence à meriter ,
 le reste est appelée vieillesse ; à laquelle doit estre
 donnée la recompense. Aussi Socrate ne tenoit-il
 capables des charges honorables , que ceux qui
 sçauent ce qu'il faut sçauoir , & le peuuent faire
 gouster par discours & raisons ; & à ceux là on
 obeit , & les respecte l'on plus volontiers. Ils pour-
 roient iustement estre appelez Senateurs pour
 leur aage , Peres pour leur autorité. Les mœurs

(quelques bonnes qu'elles soient) courent grande fortune, quand on n'a point d'égard à tout cela, & que l'argent donne tout, que s'il y entrent pour y gagner, ou si gouverner à discretion, l'on n'en peut attendre que du mal. Pour obuier ausquels inconueniens, tous ceux qui ont traicté ceste matiere, ont tenu que la perpetuité des Officiers deuroit estre ostée, qu'ils ne deuroient estre qu'annuels, pour estre continuez deux, trois, ou cinq ans pour le plus, selon le tesmoignage que l'on en donneroit au Roy, dont arriueroit beaucoup de bien à l'Estat: mais principalement ces deux, l'un & premier, qu'ayant à deuenir priuez, il aduiferoient à se gouverner si droictement en leurs charges, qu'ils ne craindroient rien en estant sortis: car d'offencer vn Iuge qui demeure toute sa vie, à tort ou à droict, il vaudroit mieux estre au vin à six blancs: le second est, que chacun participeroit aux honneurs, elles ne seroient affectées à l'argent, ny aux familles, comme elles sont: non que les enfans de bon lieu ne soient preferables aux autres, comme estant de meilleure nature, ainsi que dit Aristote: car pour les enfans d'hommes nouueaux, il leur faudroit vn long temps, beaucoup de lettres, grande preud'hommie & bien recogneuë, avec quoy il ne seroit raisonnable de les rebuter des charges d'honneur, mais à leur tour, c'est à dire des derniers: & à tous, faire de leurs pechez veniels, des mortels, comme faisoit Agefilæ, qui pardonnoit aysément les fautes des particuliers, mais estoit rude à celles des Magistrats, parce que les vns n'auoient que de peti-

tes & particulieres affaires, mais les autres manioiét les grandes & publiques: cela soit dit pour toutes sortes d'Officiers qui ont autorité, ou qui manient argent, car ces Messieurs là font bien leurs petites besongnes, si nous croyons à l'échantillon qu'ils nous en monstrent, où le plus insupportable que i'y voy, est le mépris qu'ils font des autres. Ils tiennent tous ceux qui sçauent quelque chose pour des Regens: car de leur faire croire que la science & profession que l'on en fait, purge les mœurs, & dōne l'art de parler prudemment & sciemment, ils se moquent de tout cela, cependant on ne prend pas garde que Platon nous admonnest de se garder de telles gens, comme peres de delices, paresse, seditions, & suffisans pour entreprendre quelque chose, estayez comme nous les voyons; A aquerir iustement, & faire vne despence honeste, on ne deuient point riche. Pour le luxe, ie trouue que Monsieur de la *Timeſe* à grande raison: il n'y eut iamais Estat ny Republique bien ordonnée, où les habitans ne fussent distinguez de vestement, langage, & honeurs, (dit Aristote:) Auioird'huy tout est en confusion, tout est permis à tous, & dit le mesme, que où l'on en vse ainsi, toutes choses vont au mal, comme il arriue aux malades qui negligent les ordonnances de leurs Medecins: Avec ceste grande & insoustenable licence, il faut que tout ordre soit banny, ie n'attends que l'heure de veoir faire la feste de l'yurongnerie & intemperance publiquement, comme firent ceux de Babilon, qui leur cousta bien cher, car ce iour là ils furent pris. Le

ſçay qu'il eſt ordinairement plus agreable à vne
 multitude, de viure intemperement & diſſolu-
 ment, que frugalement & modeſtement, mais d'y
 aller comme l'on faiſt, ſans diſcretion, ſans reſ-
 pect, il n'y a nulle apparence. Entre tous les luxes
 & débauches, Monſieur de la *Timeſe* à grande rai-
 ſon de ſe plaindre du jeu, & ce que i'y vois de pis
 eſt que les petits enfans en vont à la mouſtarde,
 on en faiſt des comptes, cela ſert de cure-dent en
 toutes compagnies. Quand à vos perruquez, ro-
 tondez, notamment qualifiez & vieux, ie les vous
 rends ie ne m'en puis aucunement accommoder,
 c'eſt bien loin de faire calottes en forme proban-
 te & authentique, (*Per la grauedad*) comme font
 nos voiſins. Nous penſons eſtre plus ſages qu'eux
 & c'eſt dequoy ie doute: voire mais (dira quel-
 qu'un) tout eſt-il perdu, n'y a il point d'eſperance
 de ſalut & reſipience? Si a Meſſieurs, ſi a. Il me
 ſouuient auoir leu dans Xenophon, que les Athe-
 niens ſe trouuerent en pareil eſtat que nous, ils
 auoient l'argent, (car il faut mettre cela le pre-
 mier pour parler à la mode) les honneurs, le pou-
 uoir, la ſcience, ils feirent comme nous, ils ſe ren-
 dirent fort negligens & vicieux, dequoy quelques
 gens de bien d'entr'eux offencez, s'en allerent vers
 Socrate, pour ſçauoir quel moyen ils pourroient
 auoir pour reprendre leur premiere & ancienne
 vertu, auſquels il fit reſponce, qu'il ne penſoit pas
 eſtre ignorant d'aucun, ſçauoir eſt, ſi recognoiſſans
 les premieres ordonnances & reglemens de leurs
 predeceſſeurs, ils en reprenoient l'execution ſans
 aucune diſpence, ie diſ le meſme: Pour guarir nos

desordres, il ne faut que reprendre nos anciennes ordonnances, il n'y a peuple ny nation au monde qui en ait de si belles, si iustes, si saintes, resoudre & arrester qu'elles seront obseruées, par qui & de quelque condition & qualité qu'il soit, sur certaines & grandes peines, sans lesquelles nostre mesme Cassiodore dit, que l'on ne peut faire authentifier les loix, dont l'on ne dispencera, grand, moyen, ny petit, comme on a de coustume faire, & qui a occasionné vn sçauât de ce temps, dire que la plus part des Magistrats, ne punissent ordinairement que les belistres; & ie me soubs-mettray à tout ce que l'on voudra, que nous rentrerons en nostre premier bon-heur. Or pour ce faire, ie sçay bien que les loix ne seruent de rien, si elles ne sont animées des Magistrats; nous n'en auons point de faute (Dieu mercy) & de capables, quand ils y voudront vacquer, ce sera sans peine. Tout ce qui n'est point reuouqué, se peut & doit executer, & ne faut point donner de delay, on n'en a point demandé pour mal faire, il en faut encore moins pour le bien: qui a entrepris plus qu'il ne doit, s'en preinne à luy-mesme: car comment en espereroit-on quelque chose, que de ce que l'on ordonne presentement, l'on dit haut & clair, ces presentes vingt-quatre heures apres, non valla-bles: ouy mais quarante ou cinquante y perdront; voyla bien de quoy authentifier le luxe & le vice, par lesquels il y a des millions qui y perdent biés, corps, & ames: ce qui les doit encourager, est l'assurance qu'ils ont de la bonté de nostre Roy, qui ne des-adouïera iamais vn bon & iuste procédé.

Qui

Qui le fera plus estimer à l'aduenir, que le recie
 quel'on fera de la paix entre son peuple, bonne
 intelligence entre les Iuges, & vn estat repurgé
 de mauuaises mœurs ? Il faut croire que ces gran-
 des lumieres d'Estat qui l'assistent, noublient rien
 à luy dire de ce qu'il doit sçauoir, qu'il doit conti-
 nuer en ses iustes deportemens, desquels le peu-
 ple parle plus librement que ceux qui l'abordent.
 Que ce qui en a ruiné plusieurs, a esté vne trop
 grande licence ou puissance absoluë, trop de com-
 moditez, vicieux Conseillers, des Courtisans fols
 ou detestables, & ce qui ne se peut nier, peu ou
 point de cognoissance de leurs affaires: qu'il suffi-
 ra à ses subjects de ne point mal faire, mais pour
 luy qu'il n'en doit pas estre seulement soupçon-
 né, se mettant deuant les yeux, qu'il commande à
 des hommes, non à des bestes, que ses actions se-
 ront aussi facilement cogneuës de ses subjects,
 comme difficilement il cognoistra les leur: Il est
 sur le theatre, nous sommes spectateurs: qu'il se
 donne garde des flateurs & rats de Cour, qui assie-
 gent ordinairement les ieunes Princes: qu'il est
 perilleux de trop donner à peu: si quelque Aristi-
 pe se plaint de luy, de ne donner gueres à ceux
 qui l'importunët de demandes, & beaucoup aux
 gens de merite, qu'il n'en tienne compte. Qu'il
 fasse comme Agesilæ, qui departoit ses faueurs à
 plusieurs, & selon les merites: qu'estant vray Roy
 il n'ayt soin de profiter à luy, ny à peu de gens près
 de luy, mais tout au public: qu'il demeure en cë
 qu'il a commencé, saincteté en sa maison, & en la
 force de ses armes, qu'estant bien conseillé, qu'il

fasse son profit, de ce que Trebelle Pollion rapporte, *Ils s'assemblent* (dit-il) *quatre ou cinq pour tromper l'Empereur, lequel estant dans sa maison mal-aisément peut-il scauoir la verité de ce qui se passe, il faut qu'il se contente du rapport que ceux-la luy font, il appelle pres de luy ceux qu'il en deueroit éloigner, & laisse en arriere ceux qui le seruiroient dignement, & fidèlement, ainsi se vend le bon Empereur, tout sage & aduisé qu'il soit; Que scachant toutes choses estre en sa puissance, ne tenant la Monarchie que de Dieu seul, qu'il croye neantmoins ne luy estre permis faire que les louables & iustes: que l'on luy propose les actions des bons Roys & Empereurs (voire des Payens) comme d'un Alexandre Seuer, qui entra à l'Empire fort ieune; la vie duquel merite estre leuë, & que i'ay traduit en François il y a quelque temps, que i'ay differé faire veoir au public, pour quelque raison particuliere: qu'il prenne soing spécial de la maison de Dieu, non pour en ordonner; mais pour faire executer les constitutions saintes & Canoniques; il le peut faire; il n'y a si osé ny si hardy qui pense seulement à s'y opposer, il semble que Dieu l'ayt reserué pour ce bastiment spirituel, comme il fit Salomon pour le materiel: la besongne c'est fort aduancée sous le Grand Henry son pere, s'il y manque, il ne se faudra plus attendre à personne; il a l'age, l'instruction, la volonté, le pouuoir de le faire. Ainsi faisant, il aura place en l'anneau de l'Empereur Aurelian, & nos enfans seront très-heureux d'estre en la domination d'un si bon Roy, i'oserois assurer que dans peu de temps, nous verrons le com-*

mencement de ses actions qui vous contenteront tous deux qui semblans estre en discord, (comme le Philosophe Petragore) vous n'opiniatrez point vos aduis, mais les submettez à ce qu'il se peut & doit faire par raison, vous demeurez tous deux d'accord du mal, toute vostre dispute estoit sur le remede d'iceluy, ie vous ay monsté le Medecin qui y peut tout, c'est nostre Roy, nous ne doutons point de sa volonté & affection enuers ses subjects, nous n'auons qu'à prier Dieu pour sa conseruation en longues années, & luy defiller les yeux pour recognoistre tous ces abus; & d'autres qui ne se peuuent si librement dire que l'on voudroit bien, qui menassent de perilleux succez, & ainsi il remediera indubitablement aux desordres cortez. A quoy ils respondirent que prenant l'affaire par ce bout, & l'executant, ils ne doutoient nullement de reuoir toutes choses en leur ordre, autrement qu'ils recognoissoient que tout estoit perdu, & soubscriront au iugement prononcé, dont l'ayans remercié, apres auoir touché les mains les vns aux autres, se leuerent & reprirent le chemin de la ville, où estans entrez, prirent congé les vns des autres, & chacun s'en alla chez foy.

F I N.

1. Le premier est de savoir si le
 2. second est de savoir si le
 3. troisième est de savoir si le
 4. quatrième est de savoir si le
 5. cinquième est de savoir si le
 6. sixième est de savoir si le
 7. septième est de savoir si le
 8. huitième est de savoir si le
 9. neuvième est de savoir si le
 10. dixième est de savoir si le



